

Basef Ifimba Pol Nali' Nanda'ef Fagafe'ma Esis Korini

Basef bandafi Pol nanda'ef fali' fagafe'ma Korini

1:1-9 Pol nanifela Goda esis Kristen sagape
Korini

1:10-4:21 Esis Kristen Korin sandawal biafis
apa' Pol na'ipasa basefa waf hiafi Kraisi
faloma waf amom aposeli

5:1-7:40 Esis Kristen sanda' anef waf awafi ea'
Pol na'ipasa waf bu'wafi daso'amaifi

8:1-11:1 Pol na'ipasa basefa mafis anis sa-
has sondolalima God baso'amunaisi. Ea'
nasa'ma ukup asasipi ma solawais. Na'amba
sila waf esis Israeli awafi.

11:2-14:40 Waf saga' gwa'aisi Jisasafi faloma
presen amamba hiahaom fasimi God na-
gaso'apaami

15:1-58 Basef kofagefa ma Kraisi nogosafel wa-
pani

16:1-4 Otamba esis Korin sakolasemba bafe'ma
anis Kristen kwahusa otamba maisi

16:5-24 Basef Poli akutaifi faloma basefa dagala
ananini

1-2 Ae' Pol aposel Jisas Kraisi anda' maol
ananini. Okom Godi atom nofale nandandepe
anda' maol inimba. Ae' aloma owamapa Sostenes
wape na'a'e wasapa' dagala nemaf bu'wafi
nefe'mago ipa' amam nematawa Kristen sios
pagape Korini. Ea' anda' basef ifimba fafe'mago

ipa!. Ipa' pagape sisihipama Krais Jisasi, God nanda'epa pape hilili'nofalepa nosaho'epa ea'ananipai atipa. Afa' biafa wase'epa dagala ipa'paloma epes hiasi ma walemb hielimbi sogofala agol Dembinai ape'inai Jisas Kraisi, anen dembinai ma apa!, esis wapani.*

³ Afa' biafa wa'i God ape'inai noloma Dembinai ape'inai Jisas Krais monda'ago ipa'andeande' mumafipa motopalopago opalef ipe'ilifi fepe sa'ombel.

Pol nanifela God

⁴ Ae' anifela God dondola ipa!. Dei' main, ipa' pagape sisihipama Krais Jisasi. Ea' God notopalopepa dowafa pegape andeande'ma anen atona. ⁵ Ipa' pape sisihipama Krais pape andeande' a'owa ea' pefa' basef hiafi paga'iefi faloma gawa hiani bu'wani. ⁶ Dei' main, basef ifimba bu'wafi Kraisi afa' wagawalapafi fataga alihif fandawalap banagambela opalef ipe'ilifi si'ilif.* ⁷ Ea' dei' ipa' pape ukup pehafa dembinai ape'inai Jisas Krais anaf nogataga alihina. Afamba pape pehafana apefa' presen hiani Ambal bu'unai Godi nagase'epan dowafi hi'alan. Ina anin akepa, owa'atin.* ⁸ Jisas Krais atiasi nowa'banagaepa ma pegape banagepa atipipa pefe' pegatagama nemaf afamba Dembinai ape'inai Jisas Krais nogafi'afii ma diga basef kofagesa akepa nemaf afamba.* ⁹ God nanda' hiahawes ananisi hi'alas datimai nofalepa ma pegape opaf

* **1:1-2:** Ro 1:7; 1 Ko 6:11; Ap 9:14 * **1:6:** Lu 17:30; 2 Te 1:7; Ta 2:13 * **1:7:** Fl 1:6; 1 Te 3:13, 5:23 * **1:8:** 1 Jo 1:3; 1 Ko 10:13; 1 Te 5:24

atof pegaloma Nogamana ananinai Jisas Krais Dembinai ape'inai.*

Amam nematawa Kristen sios a' sandawal wa'awa'as

¹⁰ Apa' ipa' sahin owan, a'ipipa banagoga ma agol Dembinai ape'inai Jisas Kraisi na'amba. Ipa' pendape mini'ap atetep endilisi pindaila nomonas atifisa okom atotom. ¹¹ Ipa' sahin owan ae'ipai, esis mini'ap Klowei sa'ipi sa'i ipa' panda' migimigah sape la'afena ipa!.* ¹² Ae' a'i isimba, ipa' hipai atona atin pagal'ias na'amba. Anis sal'i, "Apa' mini'ap Poli." Anis sal'i, "Apa' mini'ap Apolosi." Ea' anis sa'i, "Apa' mini'ap Pitai." A anis sal'i, "Apa' mini'ap Kraisi."

¹³ Ipa' panda'as na'amba ma main? Ipa' pa'i Krais nandawal wa'awa'ana? Ea' pa'i ae' Pol sandele lawag usi'igai ti'wanaegai ma agatopalopepa? Owa'atin endilisi. Ipa' ina pefa' baptaisa agol ae' Poli, owa'atin.* ¹⁴ Ae' anda' baptaisima amam amamba ipe'imi biam Krispusi Gaius atom. Anis epes ipe'isi daias, owa!. Ae' anifela Goda ina anda' baptaisima anis ipe'isi wapani, owa!. ¹⁵ Ea' isimba dei' anin epen ina ni'ipipa ni'i ipa' pefa' baptaisa agol ae'agili, owa!.* ¹⁶ Endilisi, anda' baptaisima esis wambota Stefanasi wapani, apa' ae' ina okom mandanda'ma anis wapani, owa!.* ¹⁷ Dei' main, Krais ina nasapa'e afi'ima enda' baptaisima anis epes, owa'atin. Anen nasapa'e ma ewalapa basef

* **1:9:** Fl 2:2 * **1:11:** 1 Ko 3:4; Ap 18:24-28; Jo 1:42 * **1:13:**
Ap 18:8; Ro 16:23 * **1:15:** 1 Ko 16:15 * **1:16:** Mt 28:19; Jo 4:2

bu'wafi Godi iga'if. Ae' ina ewalapa basef ifimba i'if ila anin gawa amom gawaimi maga'iani, owa!. Na'amba epes si'i basefa lawag usi'igai ti'wanaegai Krais nagaga'agai si'i basef ifimba owa' banagafia falafifi atif.*

18 Endilisi, epes isimba sagape ufia'w higili-galasa'wi, esis ukup pandanda'ma basefa lawag agamba usi'igai ti'wanaegai sagandola Kraisagai sa'i basef ambamba falafumi atom putuputa'im. Apa' amam nematawa dei' God nape nofa'apa nakwahomapa waf awafi mogotanimaii ea' mogawa basef amamba banagami Godi atom.*

19 Baibel naga'ias na'amba na'i, "Anaf ae' ehambombaga gawa esis isimba gawaisi. Ea' elefata nomonas epes isimba gawaisi saga'i nomonas sasisasi hiahiasi sagapaisi."*

20 Dei' amom gawaimi mondanda' mi'imama? Ea' amom gawaimi mogogawa gawa hianii monda' main? Ea' epes isimba itap apa'isi sa'i basef sapa'ef sandahihianamaifi sonda' mamahisa? Owa'atin. God nanda' gawa epes isimba itap apa'isi nataga falafalafini si'i epes isimba sahaga sagagaoli.*

21 Dei' main, epes itapasi ina la'ifisa sogogawa Goda gawa inimba asasini atin, owa'atin. God anen gawainai ea' nasopamasa ufia'w asasi'wi. Ea' anen okom mandanda' na'i nofa'ai amam nematawa sogahapifanai sotanimai. Esis sahapifa basef ifimba waga'ipasafi epes itapasi saga'i wafifi gawa akafi."

* **1:17:** 2 Ko 4:3; Ro 1:16 * **1:18:** Ais 29:14 * **1:19:** Ais 19:12; Ais 33:18; Ais 44:25; Jop 12:17 * **1:20:** Mt 11:25

Ea' God nofa'as sotanimai.* **22** Esis Juda ukup paipaila sigati maol banagani atin si'i God nanda'ani apa' esis Grik ukup pa'ipa'i sogofa' gawa hiani lu'wani.* **23** Apa' afa' wawalapa basefa Krais nagaga' lawag usi'igai ti'wanaegai. Basef ifimba fahambombaga ukup esis Judai. Apa' esis Grik ukup pandanda'mef pa'i amamba basef wafimi gawa akami.* **24** Apa' amam nematawa God nogofalapai, esis Juda saloma anis Grik wapani, basef ifimba fa'i Krais anen banagami gawa Godi.* **25** Dei' main, basef amamba Godi epes saga'i "Gawa akami wafimi", amamba gawaimi atom lu'wami mikila' gawa epesi. Ea' hiahaom amamba epes saga'i "Awanami falafumi Godi", amamba banagem a'owa' mikila' banagami epesi.*

26 Alipipai ae'ipai, ipa' ata' ukup pendanda'ma fowa' dambadamba God nogofalepa ma pagataga Kristen. Ipa' hipai ina anis epes hiasi la'afena ipa' gawaisi ma itap ana'e, owa'atin. Owa' anis hiasi agof lu'wagufisa. Ea'owa' anis hiasi dembesi banagasia, owa!. **27** Apa' God okom ananimi atom nandandepa anis epesa sogape ananisi atis. Epes isimba esis amam nematawa itapasi saga'i gawa akasi, apa' God nandandepas ea' ma nogaha iwana epes gawaisi. Ea' epes isimba itapasi hiasi saga'i falafalafisi owa' banagasia, isimba God nandandepas ea' ma nogaha iwana epes isimba dambesi banagasi. **28** Anen nandandepa

* **1:21:** Mt 12:38; Ap 17:28,32 * **1:22:** Ro 9:32; 1 Ko 2:14

* **1:23:** Kl 2:3 * **1:24:** 2 Ko 13:4 * **1:25:** Mt 11:25; Jo 7:48;
Je 2:1-5

epes isimba amam nematawa itapasi saga'i owa' fasisia, falafisi atis dowafi agof akasi. Aho', anen nandandepasa nogahambombaga hiahaom amamba banagami mogoloma epes isimba banga-gasi agufisi itap ana'iisi.* **29** Nanda'as na'amba ma anin epen ina la'lifina negasa'ma agol ananigli atogol lu'wagola naep Godi, owa'!.* **30** God nahapona ipa' pape sisihipama Krais Jisas ea' nanda' anen nepe kofagonama gawa ape'inii. Anen atona ufia'w ape'ikwi ma God nanda'apa mogape be'epa hilili'i ma naep ananipi ma mogape ananipai atepa. Anen atona natalepa nakwahepa ma waf awafi ma magape wahifipa.* **31** God nanda'am na'amba ma anif basef fagail Baibeli fetaga fendawalap. Basef ifimba faga'i, "Epen ami ni'i sonogahani, anin a' sonondahana Dembinai atona."

2

Pol nawalapa basefa Krais nagaga' lawag usi'igai ti'wanaegai

1 Alipipai ae'ipai, fowa' agafe'mago ipa' awalapa basef endilisifi Godi ma ipa', ina awalapef a'if aloma gawa ae'ani lu'wani, ma basef bu'wambu'wafi ma iga'i'ipipa, owa'atin.*

2 Dei' main, okom ae'ami mandanda' na'amba. Afamba ae' ape agalomepa ina ata' okom mapoma anom maefah daiam, owa'. Okom mase'e hiahaom. Ae' okom mondapoma Jisas

* **1:28:** Ro 3:27; Ef 2:9 * **1:29:** Jer 23:5-6; Jo 17:19; 2 Ko 5:21

* **1:30:** Jer 9:24; 2 Ko 10:17 * **2:1:** 1 Ko 1:17; Ga 6:14

Krais atona. Aho', anen naga' lawag usi'igai ti'wanaegai.*

³ Isimba atis nemaf afamba ape agalomepa, ae' owa' banageweа, ae' pupuliwi. Ae' om-bal mahe bolatin ape a'owa!.* ⁴ Ea' basef aga'ifa basef bu'wafi Kraisi, ifimba ina a'if gawa ae'ani aloma epesa igahekelipai, owa'atin. Ae' a'ipipa ihmiba'mepa banagami Ambal bu'unai Godi atona. ⁵ Anda'as na'amba ma ipa' ina ukup paipaila gawa epesi dei' pahapifa God, owa'. Anda'asa ipa' ukup pehafel pigapigaila banagami Godi atom dei' pahapifana.*

Ambal bu'unai Godi naso'apa gawa

⁶ Aho' endilisi. Ae' awalapa basef gawa naga-paifi ma epes isimba mamahisa sahapifa Goda banages ea' sanda' waf ananifi. Apa' gawa ini'i, ina itap apaini, a'a gawa amam agufumi ma itap apai anaf higiligalam lamonami.* ⁷ Waf ae'afi fowa' fagape na'amba, dei' wapani, awalapa basefa gawa Godi atin. Basefa gawa inimba fowa' nape nandambaho'ma epes, fowa' gani God ata' owa' nondal' itap apa'ea anen ea' nandandepa gawa inimba ma mogofa' banagami mogogala'i ananimi.* ⁸ Owa' anona aman atotona agilinai ma itap apa'e nogawa basefa gawa inimbaea, owa'atin. I'i amom mogawanai, dei' ina mofa' Dembinai mondolana lawag usi'igai ti'wanaegai, owa'atin. Dei' main, aman anamba banagonai mogogala'i banagamunai endilisi. Apa' owa',

* **2:2:** Ap 18:9; 2 Ko 10:1 * **2:3:** 1 Te 1:5 * **2:5:** Ef 4:13; Fl 3:15 * **2:6:** Ro 16:25 * **2:7:** Lu 23:34; Je 2:1

owa'atin. Amom agufumi ina mogawa basefa gawa inimba, owa!.* ⁹ Apa' ae' a'i basefa gawa inimba si'i Baibel na'ias naga'i,

"Hiahaom maim God nagandondombam ea' ma epes mamahisa ukup pagaila anen endilisii, amamba a' mikila' ukup epesi. Esis ina la'ifis same'am satolom sagawama ukupi naep aligh asasisi, owa'atin."*

¹⁰ Apa' God nawalapa hiahaom amamba mandawalapa apa' ma Ambal bu'winai ananinai. Ambal Godi nati hiahaom hiami mape mandam-abahi'i, ea' natolom nogawa nomonas hiasi ma waf Godi fape fandambaho' ape'i.* ¹¹ Dei' open mamahina ipe'ini negawa nomonas anin openi? Owa'atin. Ambal open inimbai atol logawas. Ea' na'amba atin, ina anin open negawa okom Godi, owa!. Ambal ananinai atona nogawana.* ¹² Apa' ina mofa' spirit ambal itapali, owa'atin. Apa' dei' mofa' Ambal bu'unai Godi ma mogogawa hiahaom maim God nogaso'apam dowafi.*

¹³ Amamba ina nomonas gawa epesi sa'ipian, owa'atin. Amamba basef Ambal buwali Godi nagawalapafi. Dei' a'ipasa basef ifimba awalapef a'ifa Ambal bu'unai Godi ma epes isimba mamahisa Ambal Godi nagapaisi.*

¹⁴ Apa' open ami Ambal bu'unai Godi akan, anin ina la'ifina negefa' hiahaom amamba fasim Ambal Godi nogoso'apam dowafi, owa'atin. Open inimba okom mapoma amamba na'i falafumi

* **2:8:** Ais 64:4 * **2:9:** Mt 13:11 * **2:10:** Pro 20:27 * **2:11:**
Jo 16:13-14 * **2:12:** 1 Ko 2:4 * **2:13:** Jo 8:47, 14:17; 1 Ko 1:23

sonda'am ki de'iafami. Anin ina negawam, owa'. Dei' main, Ambal bu'unai Godi atona nawalipasa amamba kofagema.*

¹⁵ Epen mamahina Ambal bu'unai Godi naga-paini, anin nagahihi' hiahawes hiasi. Apa' ina anin epen la'ifina nigahihi' epen inimba Ambal Godi nagapaini, owa'atin.*

¹⁶ Aho', "Dei' epes ami sogawa hiahawesa okom Dembinaii ma atiasi la'ifisa sigihimba'ma anis? Owa'atin."

Apa' dei' apa' mofa' okom Kraisi mapaepa.

3

Amam manda' maol siosi amamba manda' maol Godii

¹ Alipipai, fowa' ae' ina a'ipipa basef si'i agaso'asef epes isimba sagaila okom Ambal bu'unai Godii, owa!. A'ipipaef si'i agaso'asef epes isimba ukup pagaso'asa basef kofagefa Godii, si'i awasi ata' saga' nomagof atogufi.* ² Ata' ase'epa nomagof atogof. Ina dei' ase'epa gwa'aisi banagasi, ata' owa!. Dei' main, ipa' ina la'ifipa, ata' owa!. Ae' a'ias endilisi atis, ipa' dei' wapani ata' owa!.* ³ Dei' main, ipa' ata' pagape atapiwa ma waf opaf apinaii. Endilisi, waf anamba nawalapai waf kowagalasafi faloma ukup awepa sahin owani ma basef fitapaifi ata' fape atapifa ipa!. Isimba sihimba'ma apa' hiapai ipa' ata' paila waf anamba nembel apinai. Waf anamba

* **2:14:** 1 Jo 2:20 * **2:15:** Ais 40:13; Ro 11:34 * **3:1:** Jo 16:12;
Hi 5:12-13; 1 Pi 2:2 * **3:2:** 1 Ko 1:10-11; 1 Ko 11:18

epes itapasi atona.* ⁴ Anin open na'i, "Ae' mini'ap Poli." Anin na'i, "Ae' mini'ap Apolosi." Waf afambai ipa' ata' pape si'i epes itapasi atapipa.*

⁵ Ipa' ata' nomonas sondanda'mas andeande'. Apolos anen aman mamahonama? A ae' Pol aman mamahowema? Afa' biafa wanda' maoli atofa. Dembinai naso'afa maol nandandafa. Ea' maol inimba afa' biafa wanda'ani, ufia'w akwamba ato'w dei' ipa' pahapifa Krais. ⁶ Ae' ali' ewaha olemb gwa'aimbi, Apolos nagi' nakolo' embelas. Apa' God atotona nanda'am mataga. ⁷ Ea' dei' open inimba negewaha olemb gwa'aimbii, anin agol akan. Ea' open nagakolo' embelasi wapani anin agol akan, apa' God nanda' gwa'aisi isimba sagatagai, anen atona agol lu'wagili gatomana. ⁸ Ea' open inimba nege-waha olemb gwa'aimbii naloma open inimba naga'so' embelembii, esis bias sanda' maol inimba atini. Ea' esis bias atona atin anaf sofa' hiahawes sondahama maol sanda'ani.* ⁹ Dei' main, afa' biafa wanda' maol atitin Godi. Ea' ipa' si'i aof ananifi.

Amom manda' maola siosi mandahama manda' ifagwi

Ipa' si'i ipat Godi.* ¹⁰ Ama okom ananimi magamagailapai nagatopalopapa dowafi nanda'e ataga ape ali' si'i open gawainai nanda' ifagwi, ea' awa olaf fape fali' anis sola' ipat totomaf. Apa' epes hiiasi atona atin solawais andeande' asola' ipat totoma olaf afamba.* ¹¹ Ipa'

* **3:3:** 1 Ko 1:12 * **3:4:** Ap 18:4,11; Ap 19:1 * **3:8:** Mt 13:3-9;
Ef 2:20-22 * **3:9:** 1 Ko 15:10; 2 Pi 3:15 * **3:10:** Ais 28:16; 1 Pi
2:4-6

pegawa God nanda' Jisas Krais nepe nali' si'i olaf fotawa fagali'i. Isimba atis ina ata' anin epen la'ifina nogawa anof olaf daiaf wapani, owa'atin. ¹² I'i epen ami ni'i nela' ipat togatoma olaf afamba ilifi, anin nenda' gol nela'ata o nenda' silva mogogala' gambigambisi nela'ata, o nenda' anemba otamba sagalotamamba a'owa'i, o nenda' lawah o nenda' walol o otalef alilifi, nela'ata.* ¹³ Nemaaf afamba Krais nogafi'afii, maol inimba hiasi sonda'ani netaga nondawalap alihin nepe bo'wen a'a awen. Nemaaf afamba fetaga feloma nif lu'wafi. Ea' nif ifimba fendo maol inimba hiani epes hiasi atona atini hi'ilana sogogawa maol asasini bo'wen a'a awen. ¹⁴ I'i anin epen nela' ipat togatoma olaf afamba ilifi ma nif owa' fendetaea, anaf nefaa' anom hia-haom fasimi. ¹⁵ Apa' i'i ipat epen nanda' maoli fendota hi'galata, anaf ina nefaa' amamba fasimi, owa'atin. Endilisi, God nofa'an nogotanimai, apa' hiahawes akan nepe dowaf si'i mutanima magalu'wani nifi.*

Sios amam nematawa Kristen si'i ipat lu'unai Godi

¹⁶ Ipa' pegawa a'a owa'? Ipa' atipa si'i ipat lu'unai Godi, ea' Ambal bu'unai ananinai nepe nomona opalef ipe'ilifi. ¹⁷ I'i anin epen neham-bombaga ipat anamba, anaf God nohambombaga epen inimba. Dei' main, ipat anamba ananinai bo'ona hilili'i. Anamba ea' ipa' atipa.

Apa' ina mosa'ma agofepesi, na'amba owa'i

* **3:12:** 1 Ko 4:5; 2 Te 1:7-10 * **3:15:** 1 Ko 6:19; 2 Ko 6:16

¹⁸ Na'amba anin open nembaso'ma anin atin. I'i open ipe'ini okom mondanda' ni'i anin gawaini si'i epes itapasi sogofalasi, open inimba andeande'ma nendambema ata' netaga okom moso'an nili' ma atiasi negataga open gawaini endilisi.* ¹⁹ Dei' main, gawa itapani inimba falafalafini si'i basef epes sahaga sagagauli saga'iani ma naep Godi. Si'i Baibel na'ias naga'i, "God nofa' epes gawaisi ma waf gawai fifafifi asasifi atef baso'afi si'i epes sagaha mafis isalef."*

²⁰ Ea' Baibel na'ias wapani na'amba na'i, "Dembinai nogawa nomonas epes sogogawai falafisi atis."

²¹ Ea' anin open ina nefela agof apa' epesi, owa'i. Hiahaom hiami ipe'imi atom. ²² Poli Apolos, Pita maloma itap apa'e saloma ambal namili a ga' wapani saloma hiahawes dei' sagapani, anaf sigi' sogatagai, amamba hiami ipe'imi atom. ²³ Ea' ipa' epes Krais Jisasi, ea' anen Godi.

4

Anaf Dembinai atona nowalogam amom manda' maoli ananinii

¹ Ipa' pendegawa afa' wanda' maol Kraisi ugumafi basef endilisfi Godi fowa' fape fandambahi'ii dei' fataga fandawalap alihif.* ² I'i aman dembinai noso'ana maol anin opena nigmafian, anin nimafian ninda'an datima andeande' hi'indalan. ³ I'i ipa' pewaloga waf ae'afi ma anis daias sonda'me kot sowaloga waf ae'afi,

* **3:18:** Jop 5:13 * **3:19:** Sam 94:11 * **4:1:** Lu 12:42; Ta 1:7

ae' okom mopoma amamba falafumi atom. Ae' wapani ae' atowe ina awaloga waf ae'afi, owa!.* ⁴ Endilisi, malogol gagape opaf ae'afi nomoni ae' ina ame' anef waf awafi anda'afi, owa!. Apa' isimba ina sihimba'me endilisi ma iga'i, "Ae' epen usi'awi hilili'i", owa'atin. Aman dembinai jas nogawalog ael'i, Dembinai atona.* ⁵ Ea' dei' nogota dondo'atai ata' owa' ma, ipa' owa'i pewawalog a waf anin epen daiana. Ipa' ata' pepe pehafa nemaf afamba Dembinai nugafi'afi. Anaf anen nofa'i hiahaom hiami mandamabaho' magape akoti motaga mondawalap hauguma nogogala'ma. Nemaf afamba anen nowalapa ukup epes hiasi pape pandambahi'i petaga pindawalap alihigima. Ea' God ni'ipapa basef ananifi apa' hiapai hi'ilapa atona atin dondo' ma maol apa' manda' ani, bo'wen a'a awen.*

Esis Korin safela agof asasigufi atogof

⁶ Alipipai, ae' okom mandanda' ma'i etopalopepa. Isimba atis ae'i Apolos whimba'mepa basef ifimba doko' aga'ipipafi kofagefa ma waf afa'ifi. Afa' wanda'as na'amba ma ipa' pegelafa waf ape'ifi basef ifimba kofagefa fa'ias faga'i, "Ipa' ina pimbisila' mu'uli inimba, owa'i."

Ea' dei' ipa' ina penda' du'waniga pesa'ma agola anona daiana, owa'i.* ⁷ Alipipai, ipa' panda'as mama? Ami nanda'epa pape dembi-pai pikila' anis epes daias? Hiahawes isimba hiasi God atona nase'epas. Ea' ipa' ina penda'

* **4:3:** Sam 143:2 * **4:4:** 1 Ko 3:8 * **4:5:** Ro 12:3 * **4:6:**
Ro 12:6

du'waniga pi'i ipa' atipa dembipai banagipai, owa'i. Hiahawes isimba hiasi ipe'isi, God atona nase'epas.*

8 O aho', opalef ipe'ilifi asi'ilif ea!! Ipa' hia-haom hiamipai asi'ipa dondo!! Ipa' apikila'afa pataga dembipai king! O uwahipipa! Ae' okom ma'i a'owa' ma petaga pegape dembipai kinga atiasi ope dembifai king ogalomepa!* **9** Ae' okom mandanda' na'amba a'i God nanda' afa' aposel si'i epes sape agof akasi sagagi' endilisii. Epes hiasi hi' alas sagape ilif itapi saloma amom ensel wapani satolofa wandahama epes isimba atiasi sohas sogaga'i.* **10** Afa' wape si'i epes ukup pagaso'asi ma ogasa'ma agol Kraisi, apa' ipa' pape epes gawaipai ma waf ananifi. Afa' owa' banagefaea, apa' ipa' banagepa ea!. Ipa' agof lu'wagof, apa' afa' agof akafa.* **11** Fowa' gani wapani nafi'i nataga nogota ata'e wape nolomahafa a bambafugah fataugahifa a'owa', ea' luwaguf mais akafa. Esis sindiwa lagof sahafa atin. Afa' wambel akafa ma ofe' ogape andeande!*

12 Wanda' maol numa'uni endilisi ma lagof afa'igufi atogof. Esis sa'i basef sanda'afa findiwafa owa' afa' banagefa ofalo'mas wagwamasa basef bu'wafi atif. Esis sanda'afa aofa, wape banagefa watitilis, afa' ina wagwamas, owa'!*

13 Esis sa'ipafa basef awafi endilisi apa' owa' wagwamasa basef awanafi sa'osa'ombel. Wataga

* **4:7:** Re 3:17,21 * **4:8:** Ro 8:36; Hi 10:33 * **4:9:** 1 Ko 3:18

* **4:10:** 2 Ko 11:23-27 * **4:11:** Ap 18:3; 1 Ko 9:14-15; 2 Te 3:8;
Sam 109:28; Mt 5:44 * **4:12:** Kra 3:45

si'i alapita awasimi endilisi ma itap hiagoma si'i alogw gwagailasi, si'i itap sagafafali'api. Fowa' gani wape na'amba atin wafi'i wataga dei'.

Esis Korin sondaila waf Poli

¹⁴ Ae' ina anda' basef ifimba ma fenda'epa ambagof ipe'igufi awagof, owa'atin. Ae' okom maimailipa si'i awasi ae'ipai, a'i isalima nomonas ipe'isi.* ¹⁵ I'i endilisi ipa' amom mogawalipipa basef Kraisi 10,000-pelaim ea' hapaimi, apa' ahapepa ina hiam, owa!. Waf Krais Jisasi atef ae' atowe ape ahamepa ipe'iwai, ipa' pataga batawis ae'ipai ma basef bu'wafi Godi agawalipipafi.* ¹⁶ Isimba atis dei' afela ukup ipe'ipi ma pigaila waf ae'afi pegafe!.* ¹⁷ Ea' asapa' Timoti nafe'mago ipa!. Anen nogame ae'anai wanda' maol Dembinaii. Anen nugumafi maol inimba datima andeande'i. Ae' okom mailana a'owa!, dei' asapa'ana ma atiasi nogasa'ma nomonas ipe'isi ma basefi fe' poe ae'asi agaila waf Kraisi. Ae' agawalipa esis Kristen sios walemb anamba hiagoma ma basefi waf ea' isimba atis.

¹⁸ Anipa ukup pandanda' pa'l'i ae' bola dao' efo'o ea' panda' du'waniga.* ¹⁹ Apa' owa'atin. I'i Dembinai ni'i aho'ai, dao' efe'mago ipa' kwafalis. Apa' ae' ina efe'mago ipa'ma egegawa basef amam manda' du'wanigai manda'afi atif, owa!. Basef amamifi hapaifi. Ae' a'i efo'o egawa wafi maol mais Godi amom manda'asi.* ²⁰ Dei'

* **4:14:** Ga 4:19 * **4:15:** 1 Ko 11:1; Fl 3:17; 1 Te 1:6 * **4:16:**
Ap 19:22; Fl 3:17 * **4:18:** Ap 18:21 * **4:19:** 1 Ko 2:4

main, kofegama amamba ma epes isimba sugawisa maol Godi nope Dembinai nugumafias, amamba ina hiahaom mogal'ian atini, owa'atin. Amamba ina basef atif, owa!. Amamba banagami Godi atom. ²¹ Ipa' ukup pa'i waf mamahefa, pa'i efa'ago bumbulita okom wandafumi efo'o ma igasindi'amonepa, o pa'i efa'ago waf okom magamagailipafi sa'ombelifi efe'mepago? Isimba nomonas ipe'isi atis.

5

Waf awafi so'a waulafi fape Korin

¹ Anif basef fatagama ae' fa'i waf afamba awafi so'a waulafi fapoma ipa!. Waf awafi endilisi fagahambombaga daso'amai, waf afambai epes isimba sogololama Godi ina sanda' anef waf awafi na'ambaifi, owa'atin. Waf afamba na'amba. Anona aman a' naso' nemata'w kugumafianai ahamana nagaso'akwi.* ² Dei' ipa' ata'panda' du'waniga atin pasa'ma agof ipe'igufi ma waf afamba awafi ma main? Na'ambai owa'i. A' andeande'ma opalef ipe'ilifi fepe si'ilifa lef ipe'ini ma pegalopa waf afambai awafi. Ipa' pili'amona aman anamba nanda' waf afambai ma ina ata' nope wapani nolomepa, owa!.* ³ Endilisi, alop ae'api pape laogona ipa!, apa' ambal ae'ali lape lalomepa. Ae' si'i endilisi ape agalomepa ma agawaloga waf aman anamba nanda'afi awafi.*

* **5:1:** Lev 18:7-8; Diu 22:30, 27:20 * **5:2:** Kl 2:5 * **5:3:** Mt 16:19; 2 Ko 13:10

⁴ Dei' a'ias ea' na'amba. Nemaф afamba ipa' pendakolasafi ma agol Dembinai Jisasi, ambal ae'ali loloma banagami Dembinai ape'inai Jisasi amamba mope molomepa nemaf afamba.* ⁵ Apa' a' miliamonago aman anamba nefe'mago Satana nogahambombaga alop poloma nembel apinai ananinai. Monda'as na'amba ma God nogowambilai ambal aman anambai nemaf Dembinai aku-taifi.*

Esis Korin sindali'amongo yis amamba apimi waminif atina aman anamba aunai nanda' so'a wauli

⁶ Ipa' panda' du'waniga pasa'ma agof ipe'igufi atogof lu'wagof patiti waf afamba awafi fapomepa, amamba ina waf bu'wafi, owa'atin. Ipa' pegawa ea' basefa mu'uli inimba ma yis isimba sanda' bret tagatifi faga'i na'amba fa'i, "Yis kwasala'wis dowaf sanda' bret hiatai hi'alata tatef lu'uta."*

⁷ Ea' ipa' pili'amona yis amamba apimi ma pegape si'i bret dambaitai yis akatai, si'i endilisi ipa' pagataga epes dambaipai. Dei' main, sipsip sondolali sagahanama gwa'aisi lu'wasi Pasovai anen Krais, esis a' sahana naga' ea', si'i sondolali gwa'aisi mafis maisa God.*

⁸ Ea' apa' mondanda' gwa'aisi isimba lu'wasi Pasova, apa' ina mofa' yis amamba apimi, owa'i. Amamba si'i waf awasinai endilisi. Apa' mondofa' bret wafitai yis akatai, isimba si'i wafa ukup usi'ip hilili'i basef endilisifi.*

* **5:4:** 1 Ti 1:20; 1 Pi 4:6 * **5:5:** Ga 5:9 * **5:6:** Eks 13:7, 12:21; Ais 53:7; 1 Pi 1:19 * **5:7:** Diu 16:3 * **5:8:** Mt 18:17; 2 Te 3:14

9 Anif basef ali' anda'ef fagafe'ma ipe'i, aga'if na'amba. "Ipa' ina pefala epes isimba sanda' waf awafi so'a waulafii pi'i alipisi, owa'i."

10 Ae' ina a'iasa pegakwaha epes isimba endilisi sanda' waf awafi so'a waulafii, a epes isimba kowagalasa hiahawes anis daiasi a epes isimba sanda' wali o sagahambomba anis daiasi soloma isimba sanda' lotuma god baso'amunai, owa!. I'i ipa' pi'i pegakwahis endilisima, dao' pekwhaha itap apa'e hi'indalepa.* **11** Apa' basef dei' anda'afi kofagefa na'amba. I'i anona aman ipa' pegefalona owamepai nonda' waf awafi so'a waulafii o kowogalanama hiahawes anis daiasi o nonda' lotuma god baso'amunai, ni'i basef alafugahafi, nea' embel okom mogahanai, nonda' wal nohambomba anis daias, ipa' ina pefalana alipinai ipe'inai pi'i basef pelomana, owa'i hapainai. Ipa' ina pea' gwa'aisi peloma epes na'ambaisi wapani, owa!.*

12-13 Maol sagahihi' epes sagape ando'ma siosi ina maol ae'ani, owa!. God atona anaf nowaloga waf epes isimbai. Apa' maol sagahihi' epes sagape nomoni, dao' inimba maol ipe'ini, ipa' pendanda'an. "Ipa' li'amonago aman aunai nape la'afena ipa' nanda' waf awafii."

6

Kristen ina sonda' kotima sahin owan, owa'i

* **5:10:** 2 Te 3:6; Ta 3:10; 2 Jo 10 * **5:11:** Mk 4:11; Diu 13:5, 17:7; Diu 22:24

1 I'i anin open la'afena ipa' nenda' basef fila anin open daian, ina andeande'ma open inimba netopa'ma esis amam nematawa Godi sope ma nefe' nenda' kota naep amom dembami jas mogololama Godii. Na'ambai owa'i. Andeande'ma open inimba ambal aola nefe' nenda' kota naep amom jas mogololama Godii.* **2** Apa' amam nematawa Godi anaf mowawalogwa waf epes hiasi itapasi hi'ilas. Ipa' pegawa isimba a'a owa'? Dei' mama? A'i ipa' owa' la'ifipama ata' pegawawalogwa basef atif sa'ufifafifi ipe'ifia?

3 Apa' anaf mowawalogwa waf amom enseli wapani. Ipa' pegawa isimba, a'a owa'? Isimba atis dei' apa' la'ifipa endilisi ma mogawalogwa basef hiahawes itap apa'isi. **4** Ea' i'i ipa' anif basefa hiahawes itapasima, dei' maina ipa' pagaso'am maol inimba sogawalogwa basefa epes isimba owa' agof fogatomasa siosia? Owa!. **5** Ae' anda' basef ifimba ma fenda' ambagof ipe'igufi awagof. Dei' main? Gawaimi ipe'imi hiami mape la'afena ipa' amom la'ifimama mogawalogwa anif basef fegataga la'afena sahin owan bias ipe'isii. **6** Apa' owa' dei' anin open alipini nanda' kotima sahin owan ananini ma naep amom dembami jas owa' mogohapifa Kraisia.*

7 Aho', ipa' panda' kotima esis alipisi ea' isimba atis dei' sihimba'ma ae' ipa' apewa ea'. Dei' maina owa' pepe pititilisa sonda'mepa waf awafia? Ea' owa' pi'i aho'mas sohondo' anom maefah ipe'imia? **8** Penda'am na'amba owa'i. Apa' ipa' ea' panda' waf awafima anis epes pa-

* **6:1:** Re 3:21 * **6:6:** Mt 5:39; 1 Te 5:15; 1 Pi 3:9

hokola hiahawes asasisi! Aho', ipa' panda' waf na'ambaifi ma esis alipisi endilisi ipe'isi atis.*

⁹ Epes mamahisa sanda' waf awafii, anaf ina sefe' anamba God nagala'ambemagoma, owa'atin. Pegawa isimba a'a owa'? Na'amba ipa' pembaso'ma ukup ipe'ipi atip. Epes sanda' waf awafii ma so'a waola anis amam nematawa daiasi, a epes isimba sanda' lotuma god baso'amunai, a epes sagahabombaga waf daso'amaifi, a amam amamba ukup paga'i waf nematawaifi, a amom amamba manda'waf awafii magaloma anom amami, ¹⁰ a isimba sanda' wali, a epes kowagalasa hiahawes anis daiasi sa'i sogofa'as atini, a epes isimba sa' embela ukup magahasi, a epes isimba saga'i basef awafii findiwaifi ma anis epesi, ea' isimba sanda' wal sagahabombaga epesi, epes isimba na'ambaisi ina anaf sefe' suwis anamba God nagala'ambemagoma, owa'atin.* ¹¹ Fowa' anipa panda' waf afambai. Owa', God nasa'opepa nosaho'epa ea' ananipai atipa si'ipa. God nanda'epa' pagataga epes bu'upai hilili'i ma naep ananipi. Anen nanda'epa na'amba atina agol Dembinai Jisas Kraisi ma Ambal bu'winai God ape'inai.*

Alop ape'ipi pondape usi'ip hilili'ma mogasa'ma agol Godi

¹² Endilisi, anif basef fape fa'i, "Hiahaom hiami hi'ilam andeande'ma ae' enda'am."

* **6:8:** Ga 5:19-21; Ef 5:5; Re 22:15 * **6:10:** Ta 3:3-7 * **6:11:**
1 Ko 10:23

Apa' hiahaom amamba atiasi enda'ami ina matopalope, owa'atin. Basef ifimba faga'i, "Hiahaom hiami andeande'ma enda'am."

Basef ifimba fape, apa' ae' ina i'i aho'ma anin mae nepe lu'win nembale'e, owa'atin.* ¹³ Apa' anis epes dalias sa'i, "Gwa'aisi isimba, alopi atis ea' alop papoma poga' gwa'aisi atis."

Apa' hiahawes isimba biafis, alop paloma gwa'aisi, anaf God nolamonas atef hi'ilas. God ina nanda' alop ape'ipi ma ponda' waf awafi so'a waulafi, owa'atin. Anen nanda'apa ponda' maol ananini atin bu'wani. Ea' anen Dembinai ma alop ape'ipi nugumafiapi.* ¹⁴ Ama banagami ananimi atom nasa'ma Dembinai nosafel wando matmat, ea' anaf na'amba atina nosa'mapa mogosafel wandelef wapani.* ¹⁵ Alop ipel'ipi alop wa'awa'ap Kraisi atop. Isimba ipa' pegawas a'a owa'? Ea' dei' ipa' pa'i ae' ata' etopa' anop alop wa'awa'ap Kraisi kwaia'up esap poloma alop ano'w nemata'w kwanda' so'a wauli? Owa'atin endilisi!* ¹⁶ Epen mamahina nefal' alop ananipi nesap pogaloma alop ano'w nemata'w kwanda' so'a wauli, anin ea' nataga alop atifip naloma ako'w. Ipa' pegawa isimba a'a owa'? Dei' main, Baibel na'ias ea' waf afamba daso'amaifi usi'ifi na'i, "Esis bias asataga alop atifipa waf afambai."*

¹⁷ Apa' open ami nepe sisihin tatala'in negaloma Dembinai a' nataga nomonas atifis nalomana, si'i open atitin.

* **6:12:** 1 Te 4:3-5 * **6:13:** Ro 8:11; 1 Ko 15:20; 2 Ko 4:14

* **6:14:** Ro 12:5; Ef 5:30 * **6:15:** Mt 19:5 * **6:16:** Jo 17:21-23;
Ro 8:9-11

18 Ipa' pendakwaha waf awafi so'a waulafi pefa'pendafe'. Anef waf hiafi awafi sanda'af alop ando' atogon. Apa' epen nanda' waf awafi so'a waulafi, nanda' waf awafima alop ananipi atop.*

19 Alop ipe'ipi ipat bu'unai Ambal bu'unai Godii. Ipa' pegawa isimba a'a owa? Ambal anamba a nosaho'epa ea' nape nomona ipa'. Ipa' ina ipa' atipai, owa'atin. Ipa' ananipai atipa si'ipa.*

20 God natalepa ma maol lu'wani a'owa!. Isimba atis dei' pendasa'ma agol ananigili lu'wagola alop ipe'ipi.

7

Waf sandaso'amafi

1 Dei' a'i egwamepa basef ifimba hali'ifi panda'ef fagafi'ii. I'i anona aman owa' nogaso' ano'w nemata'wia, ea' andeande'.

2 Apa' owa', waf naninani aunai ma so'a wauli nape. Ea' dei' andeande'ma amam nematawa hiasi atona atin sondaso'ama daindai.

3 Alop amani ako'w waulu'mana kumafiap. Aman ina nondalimap ni'i ananipi, owa'. Ea' na'amba atina alop waulu'manai, alop anen waulunama'w akwa'unaii. Ako'w wapani ina kunda'imap kw'i akwa'upi, owa'. **4** Nemata'w ina kope dambe'w kumafi alop akwa'upi, owa'atin. Aman akwa'unai numafiap. Ea' na'amba atina aman ina nope dambena numafi alop ananipi, owa'atin. Ako'w waulu'mana kumafiap.

* **6:18:** 1 Ko 3:16 * **6:19:** 1 Ko 7:23; 1 Pi 1:18-19; Fl 1:20

5 Ipa' bipa pandaso'ama ea' ipa' bipa anin ina newa' alafuga anin ninda'ima alop ana-nipi, owa'i. Ama i'i ipa' ukup pegape atogona pihi'ama alop nogota bandata ma penda' betena, dao' ipa' pinda'i awi na'amba atina pendabeten bu'wani. Ama ea', penda' alop pondaloma wapani. Na'amba ukup pese'epama pigimafi alop andeande' ea' Satan nogwambepa penda' waf awafi.

6 Basef ifimba ae'afi ma amam nematawa sondaso'ama fagape na'amba. Apa' basef ifimba ina lu'wafi ma pigailaf banagambil, owa'. Ifimba basef kwaia'uf aso'epaef atopalopepa.*

7 Ae' okom ma'l i pa' amam nematawa hipai pepe si'i ae', owa' egaso' nemata'wia. Apa' God a' naso'as hiahaom fasimi mandandas daindai. Anin anom daiam a anin anom daiam.

8 Apa' esis amam nematawa owa' sondaso'amaia saloma nematawa alifiwai amom maga' makwahowa wagapani, isimba na'amba. I'i ipa' pegape dowaf si'i ae', andeande'!*

9 Apa' i'i owa' la'ifipama pepe andeande' pi-mafi nelelemb beloma alop ipe'isi andeande'a, dao' pendandaso'ama. Waf ipa' pandaso'amafi, afamba a' andeande' fikila' waf ukup pegehafel banagepa waf awafi so'a waulafi.*

10-11 Apa' esis amam nematawa sandaso'ama ea'i, ae' aso'as mu'uli inimba. Inimba ina mu'uli ae'ani atin, owa'atin. Mu'uli inimba Dembinaii na'amba. Ano'w nemata'w ina ko'waha aman akwa'unai, owa!. Apa' ako'w kwi'i kogakwhona, kondape dowaf. I'i owa', kotanima kofe'ma

* **7:6:** Mt 19:12 * **7:8:** 1 Ti 5:14 * **7:9:** Mt 5:32, 19:9

anen wapani kolomana nembel atotombel. Ea' anona aman wapani ina nili'amona waulu'mana anani'wi, owa'i.

¹² Apa' dei' a'ipa ipa' iafipa na'amba a'i. Basef ifimba ina basef Dembinaii, owa'. Ifimba dei' a'ipipa na'amba a'i i'i fowa' esis bias owa' ata' sohapifa Kraisa ma sondaso'ama sili', ma dei' anen nagi' nahapifa Kraisa ako'w kwil'i aho'ma koso'ana kolomana kogape, anen ina nili'amona'w, owa'i.

¹³ Apa' i'i ako'w ato'w dei' kugi' kohapifa Kraisa nogaso'akwa, ma ni'i aho' nope nogaloma'wa, ako'w ina kwili'amonana, owa'i. ¹⁴ Dei' main, aman owa' nogahapifa Kraisia nape sisihina nagaloma waulu'mana kwagahapifa Krais, anen a' nataga andeande' si'i God nandandepana ea'i. Ea' nemata'w owa' kogahapifa Kraisia kwape kwagaloma anen nagahapifa Krais, a' k wataga andeande' si'i God a' nandandepa'w ea'i. I'i owa' ma, bola sogola awasi, ina atiasi sotaga bo'wes, owa'. Apa' dei' sape andeande' si'i God nandandepas ea'i.*

¹⁵ Apa' open ami owa' negahapifa Kraisia ni'i nekwaha waulu'mana a'a waulunama'w, dao' anin a' nendafe'. I'i waf afambai fetaga na'amba ma esis isimba ipe'isi sahomepa o owamepa aman nemata'w, esis ina ata' tatala'is sape si'i sanda' kalabusi, owa!. Godnofalapa ma mogaila wafa opaf awanafi.*

¹⁶ Nemata'w, ina' anaf la'ifinama negatopalopa waulunamena nogataga Kristen a'a owa'? Isimba

* ^{7:14:} Ro 14:19 * ^{7:15:} 1 Pi 3:1

ina' owa' negawasa. Ea' ina' aman wapani, anaf la'ifinama negatopalopa waulu'mina ine'ikwi kogataga Kristen a'a owa!?

Apa' mundaila waf God nagawalogamapaf ape'i

¹⁷ Maol main bu'wani Dembinai nagawalogan nagaso' anin epeni, anin a' nendape atapina maol inimba atin nali' nanda'ani. Ae' a'ipas mu'uli inimba atina esis Kristen hiasi sios sagape walemb hiagomai.

¹⁸ A'i anona aman mali' matopa'mana alop ananipi ma God dei'nofalana? Dao' anen ina a' nofana melet atamba alop ananipi wapani nombaho'wata, owa'i. Ea' aman ami owa' motopa'mana alopa ma God dei'nofalanaia, amom ina motopa'mana alop ananipi, owa'i.* ¹⁹ Waf magatopa' alopafi faloma waf owa' mogatopa' alopafia wapani falafifi atef. Apa' waf sagaila mu'uli Godiafi afamba waf endilisifi. ²⁰ Ipa' pagapoma maol mamahina bu'wani God dei' nogofalipai, ipa' atapipa pendapoma maol inimba atin. ²¹ I'i ipa' agof akipai panda' maol pagape lafela anis epesi ma dei' God nogofalipai, dao' ipa' ina ukup nimanipa isimba, owa'i. Apa' i'i ano'w ufa'wa pekwhaha maol inimba pegape wahifipa, dao' andeande!.*

²² Dei' main, epen ami agol akani nanda' maol nagape lafela anis epesi, dei' epen inimba Dembinai nakwahoman waf awafi a' wahifin ea' ananini atin. Ea' na'amba atina epen nagape

* **7:16:** 1 Ko 7:20,24 * **7:18:** Ro 2:25; Ga 5:6, 6:15 * **7:21:**
Fm 16; Ef 6:6; 1 Pi 2:16

wahifina owa' negape lafela anis epesia dei' Dembinainofalan ea' nanda' maol nepe lafela Krais. ²³ God natalepa ma maol bu'wani lu'wani ananini. Ea' ipa' ina pepe lafela epes itapasi, owa'i. ²⁴ Ipa' alipipai, maol inimba mamahina bu'wani epen inimba nali' nenda'ani ma God dei' nogofalani, dao' anin a' nindapoma maol inimba atin naep Godi.*

Basefa amam nematawa owa' sondaso'amaia

²⁵ Amam nematawa isimba ata' owa' sondaso'amaia, ae' mu'uli Dembinaiii akemas, apa' awalapa nomonas ae'asi atis a'ipipa. Anen nati uwahipipiwi natopalope ea' nanda'e anda' maol ananini andeande' datima. Na'amba dei' ipa' a' pendame' basef ae'afi andeande'. ²⁶ Ama nogota ata'e dei' nimanimi lu'wami mataga, na'amba ipa' a' andeande'ma ipa' hipai pendape na'amba atin si'i dei' pagape. ²⁷ Ina' nali' nagaso' nemata'w ea'i, ina nili'amona'w, owa'i. I'i ina' ata' owa' negaso' nemata'wia, ina' okom mondanda' ni'i nefal' ano'w, owa'i.*

²⁸ Apa' i'i ina' negefa' nemata'wa, ina nanda' waf awafi, owa'. Ea' i'i nemata'w aiawai'wi kogaso' aman, ako'w ina kwanda' waf awafi, owa'. Apa' amam nematawa sandaso'amai esis atiasi a' sofa' nimanimi lu'wami itap apa'e. Andaiwa'ma nimanimi amamba mogatagamepa.*

²⁹ Ipa' alipipai, a'i basef ae'afi kofagefa na'amba. Dei' nogota ata'e ea' bandata ma itap apa'e pa'i higilgalap. Isimba atis dei' ipa' amam

* ^{7:24:} 1 Ti 1:12-13 * ^{7:27:} Lu 21:33 * ^{7:28:} Ro 13:11

pagaso' nematawai pendape si'i nematawa akipai. ³⁰ Ea' epes isimba sawa sagalifi sondape si'i isimba owa' sowa sogalifia. Epes sandagalai sondape si'i isimba owa' sondagalaia. Ea' isimba sagatala hiahawesi sondape si'i sugumafi hiahawes isimba dowafi, owa' asasisia.* ³¹ Epes isimba sanda' maola hiahaom itapamii, sondape si'i isimba owa' ukup pigapigaila hiahaom itap apa'imia. Dei' main, apa' mogawa, itap apa'e atiasi petaga pendaho'of higililap.

³² Ae' a'i ipa' opalef fendape awanelef, andaiwa'ma hiahaom mamimami mogalalamona nomonas ipe'isi. Amam owa' mogaso' nematawai ukup palapafe' hihipa maol Dembinaii, ma'i monda' hiahawes Dembinai okom maga'iasi. ³³ Apa' amam amamba magaso' nematawai, ukup amamipi pafe'ma hiahawes itap apa'isi. Ma'i mondanda' hiahawesa waf awo wauhiamam ukup panda'iefi. ³⁴ Ea' ukup amamipi a' pandawal biafip. Apa' nemata'w aiawai'wi ata' owa' kogaso' amania, okom malamafe' a'owa' ma maol Dembinai. Ako'w okom mandanda'ma koso' ako'w ato'w kogafe'ma Dembinai ma cope anani'wi hi'igala'w. Apa' nemata'w kwagaso' amani, nomonas salasagafe'ma hiahaom itap apa'imi atom kwa'i kondanda' waf waulunama'w okom manda'iefi. ³⁵ Ae' a'i basef ifimba ma etopalopepa pegape andeande!. Ifimba ina fegasopama ipe'i, owa'atin. Ae' a'i ipa' pendape usi'ipa dondol pendanda' maol Dembinaii atin ama anis maemaefah ina sopati ukup ipe'ipi,

* **7:30:** 1 Jo 2:17

owa'atin. Ipa' pendape ukup atifip endilisi.

³⁶ I'i anona aman okom mondanda' ni'i, anen ina nanda' waf usi'ifima nemata'w aiawai'wi esis sandandepamana'w anini. Ama okom ananimi mohafema ako'w, ma owa' niti ano'w ufia'wa, anen nila okom ananimi nogaso'akwa, ea' ande-ande'. Anen ina nanda' waf awafi, owa!. Esis bias ea' sondaso'ama. ³⁷ I'i anen owa' okom bimbi-afim mopoma ako'wa, nope banagona ninindifa okom ananimi andeande' ni'ias ni'i ako'w kondape dowaf, na'ambai andeande' wapani. ³⁸ Ea' aman ami nagaso' nemata'w anani'wi ea'i, anen nanda' waf bu'wafi. Apa' aman ami ata' owa' nogaso'akwia, anamba nanda' waf fasifi a'owa!.*

³⁹ I'i anona aman nagaso' nemata'wi ata' nogape namona, nemata'w akwamba anani'wi ata' kwape sisihi'w kwalomana. Apa' i'i waulunama'w akwa'unai nogaga', dao' ina ata' anin mae nahipa'w sisihi'w wapani, a' owa!. Ako'w okom ma'i kogaso' aman mamahonama wapanima, dao' kondaso'ana. Apa' ako'w kondaso' aman Kristen. ⁴⁰ Apa' ae' okom mandanda' na'amba. I'i ako'w kogape dowaf, atiasi kondagala a'owa kwikila' dagala kwagaso' amani. Nomanas ae'asi a'i basef ifimba ea' ae' okom mandanda' ma'i ae' wapani efa' Ambal bu'wali Godi nape ae' nihimba'me basef ifimba.

8

Mafis saham sowa'am sondolalimama wale baso'amunai

* ^{7:38:} Ro 7:2-3

1 Dei' ae' a'i i'i basefa mafis saham sowa'am sogopehafa wale anamba baso'amunai. Endilisi, "Apa' hiapai mogawa", si'i ipa' paga'ias. Gawa inimba atin wafini nagasa'mai waf sanda'du'wanigafi, apa' i'i apa' ukup pipila sahin owan, isimba atiasi sotopalopapa a' motaga Kristen banagepa.* **2** I'i anona aman okom mondanda' mi'i anen gawainai, owa'atin. Anen owa' ata' nogawa andeande'a.* **3** Apa' epen ami okom magamagaila Godi, dao' God nogawa epen inimba ea' ananini.*

4 Waf saga' mafis saham sondolali sagaso' wale baso'amunai ina endilisinai, owa'atin. Anen ikwaf atona wafinai. Ina a' wale endilisinai nape, owa'atin. God endilisinai anen atona nape. **5** Endilisi, hiahaom hiami sofalam saga'i, "Dembamii." I'i a' endilisi ma amom amamba sofalam sofa'i, "Wale god baso'amunai" mope ilifi itap,* **6** ea' diamamo hapaimi. God apa' manda' lotumanai atotona nape. Anen God ahamapa, anen atona kofagonama hiahaom hiami. Kofagema apa' magape itap apa'e, manda' maol ananini atin. Ea' Dembinai atotona nape, anen Jisas Krais. Lagol ananigili atogol dei' God nanda' hiahaom hiami mataga mape. Krais atona nanda' apa' mataga mape namépa.

7 Apa' anis epes gawa inimbai bu'wani akas. Epes isimba fowa' saila wale baso'amunai. Ea' dei' sa' mafis amamba sondolali sagaso' wale baso'amunaiami, ukup asasipi papoma

* **8:1:** Ga 6:3; Ap 15:29 * **8:2:** Ga 4:9 * **8:3:** 1 Ko 10:19; Ga 4:8; Diu 4:35,39; Diu 6:4 * **8:5:** Mal 2:10; 1 Ko 12:5,6; Ef 4:5,6; Jo 1:3

mafis amamba sa'i, "Amamba endilisimi," ea' sa'am. Malogof fagape ukup nomoni ea' aluguma amamba fihimba'ma esis sanda' waf awafi ea'. Dei' main, ukup asasipi ina kilikala' sawalagam andeande' sa'am, owa!.* ⁸ Apa' gwa'aimi amamba ina mofa'apa mefe' felefe'ma God, owa'atin. I'i apa' mundaiwa'ma gwa'aisi isimba, apa' ina atiasi mope awepama naep Godi, a i'i mogra' mafis isimba ma, apa' ina atiasi motaga be'epa mikila' fowa' magape, owa'atin. Apa' mape wahifipa ma mu'uli inimba fowa'ini naga'i gwa'aisi isimbai.*

⁹ Apa' ipa' solawaipa. Na'amba hiahawes isimba ipa' pape wahifipa panda'asi supisila bo'wagah esis epes isimba owa' banagesa sowa ma waf awafi. ¹⁰ Ina' epen negegawai, i'i negafe' ipat atamba sanda' lotuma wale baso'amunai nepe nega' gwa'aisi, ma anin epen okom ananimi owa' banagema hapifia nigatilina. Atiasi nesa'mai okom ananimi nea' gwa'aisi isimba sagaso' waleasi, a'a owa'? Apa' ina mogawa.* ¹¹ Na'amba gawa ine'ini nehambombaga epen inimba owa' banagena hapifia, Krais naga' nofa'an negetambilii. ¹² Ukup anis sahin owan alipisi ina banagep, owa!. I'i ipa' penda' waf afamba awafi pehambombaga hapifa ukup asasipi, ipa' panda' waf afambai ma Krais atona.* ¹³ Ea' i'i gwa'aisi isimba aga'asi sonda' alipini ae'ani newa ma waf awafi, dao' ae' ina ata' ea' mafis isimba wapani, owa', hapaimi. Na'amba a' enda' anin newa ma

* **8:7:** Ro 14:17 * **8:8:** Ro 14:13-15; Ga 5:13 * **8:10:** Ro 14:15,20 * **8:12:** Ro 14:21

waf awafi.

9

Wafa maol amom aposel manda'ani

¹ Dei' ae' a'i ihali'ipa esa'ma nomonas ipe'isi. Ipa' pa'l iae' ape wahifiwi ape aposel ati Dembinai Jisas ea' a'a owa'? Ea' anda' maol inimba atina dei' ipa' pataga Kristen, a'a owa'? Aho' endilisi.*
² I'i anis epes ukup pandanda' pa'l iae' owa' aposela, diago, hapaisi. Ipa' dao'. Ipa' pahapifa Dembinai pape sisihipama anen. Isimba atis dei' ipa' atipa si'l anol ametal lihimba'ma ipa' hipai pegawe ape aposel anda' maol Dembinaii.

³ Apa' anis epes sanda'i'ipamae sawaloge. Ea' agwa basef na'amba.* ⁴ Endilisi afa' aposel andeande'ma ogofa' gwa'aisi maina maol afa' wanda'ani.* ⁵ Ea' andeande'ma ogaso' nematawa Kristen ofe' ogalomawa si'i anom aposel maloma amom owapana Dembinai Jisasi maloma Pita manda'as. ⁶ Ina andeande'ma ae'i Barnabas atofa onda' maola ogofa' otamba afa'imbai, apa' anis daias ipa' atipa petopalopas pimafiasa otamba. Na'ambai owa'!

⁷ Aman mamahonama nanda' maol soldiai anen atona notala gwa'aisi mais ananisi? A open ami nanda' hiahawes nawas aof ama anen owa' nofa' gwa'aisiafa? O open ami nimafi bulmakau ma anin owa' nea' nomagofa amoma? Owa'atin endilisi. ⁸ Ae' aila ukup epesi atip a'ias na'amba? Owa'atin. Mu'uli God nagaso' Mosesani naga'ias

* **9:1:** 2 Ko 3:2-3; Ap 22:17-18, 26:16; 1 Ko 15:8 * **9:3:** Lu 10:8;
 1 Ko 9:13-14 * **9:4:** Jo 1:42

na'amba atin.* ⁹ Moses nanda' basef fagape mu'uli Godi faga'ias na'amba fa'i, "Bulmakau manda' maol mafa'asa olemb wit magandila-mami ma'i mogal anom, ipa' ina pesopama malogof amamugufi, owa'i."

Ipa' pa'i God okom mandapoma amom bulmakau atom a'amom? Owa'atin.* ¹⁰ Anen okom ma'i apa' wapani. Aho', basef ifimba fa'iasa apa' atepa. God okom ma'i waf afambai. Epen nenda' maol negala' itap ananipii neloma epen ami nenda' maol negala' gwa'aisi sagaof ea'i, anin dao' okom mondanda'ma opaf ananifi ma negefa' hiahawes du'wanisa maol inimba.* ¹¹ Afa' wanda' maol Godi wagape na'amba atin. Afa' wawa hiahawes bu'wasi Ambal bu'unai Godi nagaso'afa asi la'afena ipa'. Ea' ipa' ilama pese'afa anis hiahawes pegatopalopa alop afa'ipi ma isimba ina ahifisa ipa', owa'atin.* ¹² Ipa' paso'am hiahawes anom amam daiam magawalipipa basef Godii, apa' afa' dei' mama? Afa' wapani peso'afa hiahawes ipe'isi, andeande'. Dei' main, afa' wali' wanda' maol wagatopalop-ipai.

Apa' hiahawes isimba afa' wa'i aho'ma ogofa'asi, owa' afa' ina ofa'as. Fowa' dambadamba afa' wali' wagafe'mago ipa' wafi'i wafi'i wataga dei', afa' wandaiwa'ma ogwahefa ufia'wa basef bu'wafi Kraisi. Isimba atis afa' wandaiwa'ma ogofa'as. Ea' isimba atis dei' nimanimi hiami matagamafa.*

* **9:8:** Diu 25:4; 1 Ti 5:18 * **9:9:** 2 Ti 2:6 * **9:10:** Ro 15:27

* **9:11:** Ap 20:34-35; 2 Ko 11:9; 1 Ko 13:7 * **9:12:** Nam 18:8,31;
Diu 18:1-3

13 Dei' ipa' ukup pendanda' ma anif basef. Amom manda' maol ipat lu'unai Godii mofa' gwa'aisi ipat anamba. Ipa' pegawa amom manda' maola belita atamba sondolalima mafisa Goda, amom wapani mofa' mafis du'wa'wanisi belita atamba.* **14** Ea' na'amba atin Dembinai nanda' mu'uli inimba nape. Amam ami magawala basef bu'wafi Godii, amom ata' mondofa' hiahawesa esis amam nematawa sogofa' basef bu'wafi ma sogatopalopa alop amamupi.*

15 Apa' ae' owa' efa' anis hiahawes isimbaia. Ea' dei' wapani ina anda' basef ifimba ma iga'ipipa ae' andeande'ma egefa' anin mae atitina ipa', owa'atin. Andeande'ma ae' ili' endaga'. Ae' andagala anda' maol Godi atopalopepa owa' efa' anis hiahawes isimbaia. Ae' dei' andaiwa'ma anin epen negali'amona dagala ae'ani ma egasa'ma agol ae'agili ma waf afamba, owa!.* **16** Apa' ae' ina andagala asa'ma agol ae'agili atogol awalapa basef bu'wafi Godi, owa'atin. Ae' owa' ano'w ufia'wa esopama malagola iga'ipasefa, owa!. Okom ae'ami mahafel endilisi ma a'i inda'ipasef atin. I'i ae' owa' ewalapa basef ifimba bu'wafia, na'amba God nese'e nimanimi lu'wami.* **17** I'i okom ae'ami atom enda' maol inimba ananiniai, anaf efa' otamba ma maol inimba. Owa' owa'atin. Ae' owa' ano'w ufia'wa, andanda'am atin. Dei' main, inimba anin maol God nase'ean ae' enda'ani. **18** Anaf efa' hiahaom fasimi maima anda' maol inimba? Hiahaom amamba fasimi na'amba. Ae'

* **9:13:** Mt 10:10; Lu 10:7; Ga 6:6 * **9:14:** Ap 18:3 * **9:15:**
Jer 20:9 * **9:16:** 1 Ko 4:1

anda' waf afamba bu'wafi atef. Hiahawes ae'ila ma egefa'asa maol inimbai, isimba ina efa'as, owa!. Ae' awalapa basef bu'wafi Godi aso'asef dowaf. Ae' ina a' efalasa hiahawes otamba maisa sogase'e si'i mu'uli Godi naga'ias, owa!.*

Pol nape lafela amam nematawa hiasi manogatopalopas

¹⁹ Ae' ina anda' maol ape lafela anin epen, owa!. Ae' ape wahifiwi. Apa' okom ae'ami atom anda' ae' ape si'i agape lafela epes hiasi ma egefa'i hiasi sondahama ikwafa pepel ae'ani sogafe'ma God.* ²⁰ Isimba atis dei' naep esis Judai ataga si'i Juda, ma igifa'ai anis Juda. Ae' ina ape lafela mu'uli God nagaso' Mosesani, owa!. Apa' naep isimba sagape lafela mu'uli inimbai, ae' wapani ape lafela mu'uli inimba ma efa'i epes isimba sagafe'ma God.* ²¹ Ea' naep epes isimba sogololama mu'uli inimba owa' Judaisia, ataga si'i epes isimba sogololama mu'uli inimbai, ma efa'i epes isimba sagafe'ma God. Apa' ae' ina okom mase'e mu'uli Godi, owa'atin. Dei' aila mu'uli Kraisi.* ²² Ama naep epes isimba owa' banagasia, ataga si'i esis ama egefa'i epes owa' banagasia. Ae' ataga si'i egefa' waf epes hiasi endondoma ufiawa hiawai ma iwambilai anis sogotanimai. ²³ Ae' anda' maol inimba ma egafela agol basef bu'wafi Godi ma anaf egefa' hiahawes isimba bu'wasi blesing epes isimba saila basef ifimbai sogofa'asi eloma anis epes Godi wapani.

* **9:18:** Mt 20:26-27 * **9:19:** Ap 21:20-26 * **9:20:** Ga 2:3

* **9:21:** 2 Ko 11:29; Ro 11:14

Apa' mondasagih banagambela mogofa' hia-haom bu'wami

²⁴ Ipa' pegawa epes sasagih sandaloloma atini hiasi sasagih hi'alas safe', apa' atitin nikila'as nefo' prais hiahawes fasisi. Ipa' pegawa isimba a'a owa'? Ea' ipa' wapani pendasaqih mehipa pegefa' hiahawes isimba fasisi.* ²⁵ Epes ami sa'i sisagih sigikila'i ma depambema inimbai, sanda' maol numa'wini a'owa' sagwamba alop asasipi sameme'map nimaguf danda. Epes isimba sanda'am na'amba ma sogofa' prais hia-haom bu'wami kwasakwasala magape nogota bandatai. Apa' Kristen manda'ama mogofa' at-apim hiahaom fasimi mogape dondoli. ²⁶ Isimba atis ae' dei' naep do' okom kilikala' asagih mehipa ikila' hiasi hi'igalas. Ae' ape si'i anona aman nanda' bokseni nagapa', owa' nokwaha lagof ganigani noha fufutal atol dowadowafa, owa'atin.* ²⁷ Ae' banagewe aha alop ae'api anindifap ahamap usil'ip pape lafela okom ae'ami. Na'amba egawalapa basef bu'wafi ma anis epes daias, apa' anaf owagama ae' ina efa' prais hia-haom fasimi, a' owa'atin.

10

¹ Alipipai, ae' andaiwa'ma ipa' ukup mogamogahepama hiahaom amamba. Esis bafasapa hisasi Israel sape lafela ilagw agwamba gwali'as sagafi'i ea' hiasi safe' bo'wagah asasigahi sowala sambo naoh embel akwahimi* ² sawisa ilagw

* **9:24:** Fl 3:14; 2 Ti 4:7-8; 2 Ti 2:4-5; Je 1:12; 1 Pi 5:4 * **9:26:**
Ro 8:13, 13:14 * **10:1:** Eks 13:21-22; Eks 14:22-29

gwaloma naoh embel sagafi'i. Amamba mondola'waifa sogofa' baptais sape sisihis saloma Moses sailana sagafe!.* ³ Ea' esis hiasi sa' gwa'aisi isimba God nagaso'asasi,* ⁴ sa' embel ambalemba God nagaso'asambeli. Aho', sa' embela otam amamba God nagaso'asami nafe' nagalomasi. Otam amamba nondola'waifa Krais atona.* ⁵ Apa' owa!, God nandaiwa'ma hiasi sagape la'afena esisi. Isimba atis dei' sasa sowala hi'alas itap anamba wafigima fataupigima.*

⁶ Ea' hiahaom amamba hiami mataga mindihimba'mapa si'i anef ikwafa apa' motolom mogogawama apa' ina a' kowolapa ukup pipila hiahaom awami si'i esis fowa!, owa'i.* ⁷ Ipa' ina kowolepa pila wale baso'amunai si'i isimba anis fowa' sanda'am, owa'i. Baibel naga'i esis na'amba na'i, "Amam nematawa sape sanda' gwa'aisi embel sa'as sosafel salemb atin sanda' kwala'ap kinde'iaf sa'oh."*

⁸ Apa' wapani owa'i monda' waf afamba awafi so'a waulafia si'i isimba anis fowa' sanda'am, ama nemaf atetef esis 23,000-pelais saga' dolamas hi'alas.* ⁹ Ea' apa' ina mososaefa God mogwambana si'i isimba anis fowa' sagagwambana ma uguf awagufi fahasa esis higilagalas, owa'i.* ¹⁰ Ipa' ina a' ukup awep pi'i diga wandafugai peloma God si'i isimba anis fowa' sanda'manam

* **10:2:** Eks 16:35 * **10:3:** Eks 17:6; Nam 20:11 * **10:4:** Nam 14:26-30; Hi 3:17; Ju 5 * **10:5:** 1 Ko 10:11; Nam 11:4,34 * **10:6:** Eks 32:6 * **10:7:** Nam 25:1-9 * **10:8:** Nam 21:5-6 * **10:9:** Nam 16:41-49; Hi 3:11,17

God, ma ensel anamba naha epes sagaga'ii nafli'i nahas sagaga' hi'agalas, owa'i.*

¹¹ Hiahaom amamba hiami magatagama esisi, amamba si'i ikwafa apa' epes dei' magape nogota ata'e felefele'ma ta'i hi'igilatai. Amamba si'i ikwafa apa' mogatoloma solawaipa, na'amba monda' waf awafi si'i esis. ¹² Ea' i'i epen ami niga'i anin atin la'ifin nagalutu banagani, anin a' nendape solawain andeande'. Na'amba newa ma waf awafi.* ¹³ Gwamba maina nagatagama ipe'i, amamba ina anom daiam, owa'atin. Amamba ea' na'amba atin si'i gwamba hiani nagatagama epes hiasi. God naila basef ananifi endilisifi nanda' hiahawes ananisi datima. Anen ina atiasi ni'i aho'ma anin gwamba netagama ipa' nikila' banagami ipe'imi, owa'atin. Nemaf afamba gwamba nogatagamepa, God nonda' ano'w ufia'wa notopalopepa pegalutu banagepa.*

Apa' ina' mila wale baso'amunai noloma ambagofawami moloma God wapani, owa', hapaimi.

¹⁴ Ipa' alipipai endilisi ae'ipai, ipa' pekwha waf afamba pagailafa wale anamba baso'amunaii pewa' alafugaha anen. ¹⁵ Ipa' pegegawai, dei' a'ipipa. Ipa' atipa pewawalog a basef ifimba ae'afi.* ¹⁶ Kap apamba aman nugumafi lotuwi nogofalo'mapi, apamba na'amba. Apa' manifela Goda kap apamba pakolasa apa' magaloma esimb el Kraisi. Endilisi atis bret atamba apa' magawalotai, atamba

* **10:10:** 1 Ko 10:6; 1 Pi 4:7 * **10:12:** 1 Ko 1:9 * **10:13:** 1 Jo 5:21 * **10:15:** Mt 26:26-28

takolasepa magaloma alop Kraisi.* ¹⁷ Bret ea' atotota. Amamba mihibma'mapa amam nematawa hiapai mape si'i alop atotop. Dei' main, apa' hiapai mandaloma ma' bret atotota atamba.*

¹⁸ Ipa' ukup ata' pendapoma esis Israel. Epes isimba saga' gwa'aisi mafis sondolali ma God belita atambai sandakolas saloma Goda belita atamba.* ¹⁹ Basef kofagefa doko' aga'ipipafi fa'i main? Gwa'aisi mafis mais sondololima wale baso'amunai endilisisi? O, wale anamba baso'amunai endilisina? Ae' aga'ias na'amba? Owa'atin.* ²⁰ Ae' a'ias a'i hiahaom esis sogololama Godi sondolalima wale baso'amunai, ina sondolali ma God, owa'atin. Ae' andaiwa'ma ipa' pendakolas pegaloma wale anamba baso'amunai, owa'i.* ²¹ Ipa' ina pea' embela kap Dembinaii poloma kap wale baso'amunai wapani, owa'i. Ea' ina pea' gwa'aisi belita Dembinaii soloma gwa'aisi belita sondolali ma wale baso'amunaiatai wapani, owa'i.* ²² Apa' ina a' monda' maol mondao'oma mogaloma wale baso'amunai monda' okom Dembinai aoma apa', owa'i. Apa' ina a' mi'i apa' banagipai mikila' Dembinai, owa!*

²³ Ipa' pa'i, "Andeande'ma monda' hiahaom mamimami hiami."

Isimba endilisi, apa' ina a' amamba hiami matopalopapa, owa'atin. Ipa' pa'i "Andeande'ma monda' hiahaom mamimami hiami."

* **10:16:** Ro 12:5; Ef 4:16 * **10:17:** Lev 7:6 * **10:18:** 1 Ko 8:4

* **10:19:** Diu 32:17; Re 9:20 * **10:20:** 2 Ko 6:15-16 * **10:21:**

Diu 32:21 * **10:22:** 1 Ko 6:12

Apa' ina hiahaom hiami manda'apa mataga banagepa ma hapif, owa'atin.* ²⁴ Ipa' ina a' ukup pepoma ipa' atipa pindumafuma pepe andeande', owa'. Ipa' ukup pendapoma anis daias wapani ma petopalopas sogape andeande'.

²⁵ Ambegw hiami mafisim sagatalom stowai, amamba ipa' penda'am. Ina a' nomonas sope hiahias piyahali'mam na'ana'a, owa'i.*

²⁶ Dei' main, "Itap apa'e paloma hiahaom hiami hi'alam amamba Dembinaii atom."*

²⁷ I'i anin open owa' nogahapifa Kraisia ne-falepa ni'i pefe' peloman pega' gwa'aisi ma pi'i pegafe'ma, dao' andeande'. Pefe' pea' gwa'aisi hiasi anin nandandombas nagasi'ipasi. Ipa' ina a' nomonas sotagamepa hiahias piyahali'anas na'ana'a, owa'i.* ²⁸ Apa' i'i anin open nili' ni'ipipa niga'i, "Mafis isimba sondolalima wale baso'amunaisi", dao' ipa' apegawa basef ananifi ina pea'as, owa'i, hapaisi. Ipa' pinda'i uwahipigama open inimba. ²⁹ Ae' ina a'i peme' malogof fagape ukup ipe'ipi nomoni pilas, owa'. A'i pindaila malagol gagape okom nomon open inimba naga'ipipai. Na'amba anin open daian ni'i, "Ae' agape wahifiwai. Dei' maina okom anin open owa' banagania mogasindi'amona ae??"* ³⁰ I'i ae' inifela Goda ega'as, dei' maina anin open nesopama ae' ma ega' mafis isimba aganifela Godasi? Na'ambai ae' andaiwa!."*

* **10:23:** Ro 15:2 * **10:25:** Sam 24:1 * **10:26:** Lu 10:8
 * **10:27:** 1 Ko 8:7 * **10:29:** 1 Ti 4:4 * **10:30:** Kl 3:17

31 Dei' egwa basef epen inimbai. I'i ipa' pi'i pega' gwa'aisi embel mais a penda' hiahawes mamahisa, penda'asa pegasa'ma agol Godi atogol lu'wagol.* **32** Ipa' a' ukup pendapoma epes hiasi hi'indalas, esis Juda soloma esis owa' Judaisia, ea' soloma amam nematawa sios isimba Godi. Ea' ipa' ina a' penda' anef waf fenda' esis sogowama waf awafi, owa'i.* **33** Si'i ae' wapani, anda' hiahawes hiasi ma egatopalopa epes hiasi ma ukup pigal'i waf bu'wafi hiafi ae' anda'afi. Ae' ina anda'as atopalopa ae' imafi ae' atowe, owa'. Anda'asa agatopalopa amam nematawa hiasi ma God nofa'as nokwahomas waf awafi sogotanimai.

11

1 Ipa' pendandepa waf ae'afi pila ae' si'i ae' andandepa waf Kraisi ma agailana.*

Waf sogapalo' balagh sanda' lotu

2 Lifilafi ipa' ukup pandanda'ma ae' paila basef ifimba hiafi agasi'ipafi. Basef ifimba egefa'afi dei' a'ipipaef ipa'. Isimba atis dei' anifelipa a'i panda' waf bu'wafi endilisi.*

3 Dei' a'i ipa' pegawa basef ifimba. Agili-nai amam hiamii anen Krais atona ea' agili-nai ako'wanai waulunama'w atona ea' agili-nai Kraisi God atona. **4** I'i aman ami Ambal bu'unai Godi nosa'mana ni'ipasa basef Godi si'i profet a'a nondabeten ama siti anen nopal' balaga, aman anamba atiasi a' nonda' agol

* **10:31:** Ro 14:13 * **10:32:** 1 Ko 9:20-22 * **11:1:** 1 Ko 4:16

* **11:2:** Jen 3:16; Ef 5:23; 1 Ko 3:23

Kraisi agilinai ananinai gowala. ⁵ Ea' nemata'w ami wapani Ambal Godi nosa'makwa kuga'ipassa basef Godi si'i profet a'a kondabeten ama owa' kopalo' balaga ako'ugaia, ako'w wapani kwanda' ambal waulunama'wi aol. Isimba ea' na'amba atin si'i kwagando balaga ako'ugai hi'agalaga. ⁶ I'i nematawa owa' opalo' balagah awaugahia, awo a' ondatopa'agah bandagah. Waf apa' hiapai fagape na'amba. I'i ambagof awagofa ogatopa'agah bandagah a'a ondowaghah hi'igalagah, apa' ma'i waf afamba awafi fanda' nematawa ambagof awagufi. Dei' isimba atis andeande'ma awo ondopalo'agah.*

⁷ Amam owa'i mopaloi' balagah amamugahia. Dei' main, God nanda' amam mandati si'i anen ama mogawalapai banagami mogogala'i ananimi. Apa' nematawa wagawalapai banagami mogogala'i amami.* ⁸ Dei' main, God ina nanda' amana alop nemata'wi, owa'atin. Anen nanda' nemata'wa alop amani.* ⁹ Ea' isimba wapani, God ina okom mandanda'ma nemata'w dei' nanda' amana nogatopalopa ako'w, owa'atin. Anen okom mapoma aman dei' nanda' nemata'wa kogatopalopana. ¹⁰ Isimba atis dei' nematawa ondapalo' balagah awaugahi ondola'waifa ogape lafela amom wauhupawa awoumi. Awo opalo'agah ondambaho'agaha ombal begahawa ma amom ensel mogatolowa.

¹¹ Apa' magape sisihipama Dembinaii magape na'amba. Ina nemata'w ato'w kope aman

* **11:6:** Jen 1:26-27; Je 3:9 * **11:7:** Jen 2:21-23; 1 Ti 2:13

* **11:8:** Jen 2:18

aka'w o aman atona nope nemata'w akana, owa'atin. ¹² God nanda' nemata'wa alop amani ea' na'amba atin dei' nanda' amam mataga alop nematawai. Apa' God kofagonama hiahaom amamba hiami hi'alam.

¹³ Dei' ipa' atipa ata' pendawaloga basef ifimba. I'i nematawa owa' opalo' balagah awaugahi onda' betena Goda, isimba andeande' a'a owa'? ¹⁴ Waf ape'ifi amam nematawai atef ea' fi-himba'mepa' na'amba. I'i amam balagah laugahi, isimba sanda'am ambagof awagof. ¹⁵ Apa' i'i nematawa balagah hopaowa, dao' andeande', balagah si'i sosaf bu'wafi awaufi. Dei' main, God atona naso'awa balagah laugahi awo ma hogaso'ala balagah awaugahi. ¹⁶ Apa' i'i epen ami ni'i basef negapa'efa hiahawes isimba, anin a' nendegawa, apa' ina maila anef waf daiaf, owa'atin. Maila waf afambai atef. Ea' esis sios amam nematawa Godi hiasi dei' sailaf na'amba atin.

Esis Korin sahambombaga gwa'aisi Dembinaii

¹⁷ Ae' a'i ese'epa anin mu'uli ipa', apa' ae' ina esa'ma agof ipe'igufi, owa'atin. Nogota atamba pandakolas panda' lotu, dakolas ipe'ini nahambombagepa.* ¹⁸ A'i ili' iga'iasi isimba. Nogota atamba ipa' pandakolas panda' lotu, ipa' pandawawal atin. Ae' agame' basefa ipa' na'amba. Ea' ae' okom ma'i kwasakwasala a'i endilisi ipa' pandawawal.* ¹⁹ Endilisi, ipa' pandawawal atin pa'i waf afamba bu'wafi ma epes mamahisa sagaila basef endilisii sotaga sondosali alihis?

* **11:17:** 1 Ko 1:10-12; 1 Ko 3:3 * **11:18:** Diu 13:3; 1 Jo 2:19

Owa'atin endilisi. ²⁰ Afamba ipa' hipai pandakolaso, ipa' ina pefa' gwa'aisi Dembinaii, owa'atin. ²¹ Ipa' hipai atona atin pali' ulu ulal pa' gwa'aisi ipe'isi atis. Ea' anin nolomahan napé, a anin daian na' embel wain hiani okom mando molan.* ²² Ipa' ifagw akepama pega' gwa'aisi embel mais? O ipa' pa'i sios amam nematawa Godi isimba awasi falafisi atis, a'a? Ipa' pa'i penda' anis epes gwa'aisi akasi ambagof awagof iwaniguf? Dei' atiasi i'i basef maifa ipa'? Isa'ma agof ipe'igufi? Owa'atin. Hiahawes isimba ipa' panda'asi ae' ina anifelipa asa'ma agof ipe'igufi, owa'.

Dembinai Jisas nasa'ama gwa'aisi ananisi amam alipumi

²³ Basef ifimba ae' agasi'ipafi ifimba ae' efa'efa Dembinai atona. Ifimba na'amba. Owamb ambamba Judas nagaso'ama Jisas nogafe' lagof amom boumii, ma owamb ambamba Dembinai Jisas nasa'ma bret ²⁴ ea' nanifela God nawalota na'i, "Amamba alop ae'api, ase'epapa agatopalopepa!. Ipa' penda'as ea' na'amba atin ukup pendanda'ma ae!."*

²⁵ Amom ma'as ea', anen nasa'mai anop kap embel bagalapi nanda'as na'amba atin na'i, "Kap apamba basef banagafi dambaifi ae'afi agala'lapafi. Ametala basef ifimba esimbel ae'ambeli atembel balo bagatopalopipai. Nimaguf hiafi danda ipa' penda' isimba pega' embel, penda'as na'amba ma ukup pegapoma ae!."

* **11:21:** Je 2:5-6 * **11:24:** Eks 24:6-8; Sek 9:11; Hi 8:8-13

Fowa! Jisas naga'ipa alipumi ananimi na'amba.
²⁶ Nimaguf hiafi ipa' pega' breti kap embel isimba
 ma, ipa' pewalapa basefa Dembinai nagaga' feta-
 ga alihif fefe' fefe' fetagama nemaf anen nu-
 gafi'afii.*

*Epen ami negahambomba gwa'aisi Dembi-
 naii, kofagema ananimi atom*

²⁷ I'i anin epen owa' okom mili' mope ande-
 ande'ma nea' gwa'aisi isimba breti embela kap
 Dembinaii dowadowaf, anin nanda' waf awafi
 ma alop paloma esimbel Dembinaii, ea' epen
 inimba kofagema mopoma anin atin.* ²⁸ Apa'
 hiapai ata' muli' mondowaloga ukupi nomonas
 ape'isi atis ama main, mea' breti embel kap
 isimba. ²⁹ Dei' main, i'i epen owa' nowaloga
 basef kofagefa ma alop Dembinai ma anin nea'
 gwa'aisi embel dowafa, kofagema epen inim-
 bai atom. ³⁰ Kofagema ea' amamba atom dei'
 amam nematawa hiasi la'afena ipa' pupulis,
 owa' banagesa, ea' aowas naninani hiani anis
 saga'ma waf afambai. ³¹ I'i apa' muli' nomonas
 kilikala'ma mowawaloga nomonas ape'isi atis
 andeande'ai, atiasi ina anom kofagema mo-
 tagama apa', owa'atin.* ³² Apa' i'i Dem-
 binai nagahihi' waf ape'ifima nogagwa waf
 awafima apa'a, isimba anen NASA'apa bumbulita
 nasindi'amonapa ma anaf ina higililapa moloma
 epes sagaila waf itapafii, owa'atin.

³³ Ea' dei' ipa' alipipai ae'ipai, i'i ipa' pekolata
 pega' gwa'aisi Dembinaii, ipa' ata' pepe pehafa

* **11:26:** Hi 10:29 * **11:27:** Mt 26:22; 2 Ko 13:5 * **11:31:** Hi
 12:5-6

anis sili!. ³⁴ I'i anin open ami nolomahan, anin ata' nili' nenda'ago gwa'aisi ipat ananitai. Na'amba dakolas ipe'ini newalapai basef kota ipa!.

Basef ifimba du'wanif fagapani ata' owa' iga'ipipafia, nemaf mamahefa egafe'mago ipa', dao' i'ipipaef isindi'amonepa.

12

Presen hiahaom fasimi Ambal bu'unai Godi nagaso'apami

¹ Ipa' alipipai, ae' a'i enda'mepago basef ifimba ma presen hiahaom fasimi Ambal bu'unai Godi nagase'epam ipa' atona atini. Dei' main, andaiwa'ma anipa ipa' ukup pegelelaipa ma amamba.* ² Ipa' pegawa ea' ma fowa' ipa' ata' pagape aopama waf awafi pegelelama God, nogota atamba ipa' ukup paila wale baso'amumi maim magahondo'ipai, mememi owa' muga'i kwasakwasalaia.* ³ Ea' ipa' pendegawa open mamahina Ambal bu'unai Godi NASA'man naga'i basefi, ina atiasi ni'i basef ni'i, "Jisas anaf hig-ililana," owa'atin. Ea' open ami Ambal bu'unai Godi akani, anin ina atiasi ni'i basef ni'i, "Jisas anen Dembinai," owa'atin.*

⁴ Presen hiahaom fasimi Ambal bu'unai Godi nagaso'apam dowafi, amamba hiami mami-mami. Amamba Ambal Godi atona naso'apam.*

⁵ Maol Dembinai hiani naninani nape, apa' Dembinai atotona nape numafian. ⁶ Waf hiafifafifi

* **12:1:** Hab 2:18-19 * **12:2:** 1 Jo 4:2-3 * **12:3:** Ro 12:6; Ef 4:4 * **12:4:** Ef 4:11

manda' maolafi, apa' God ea' anamba atotona
naso'apa pepel epes hiapai ma la'ifipa monda'
maol inimba hiani hi'igalan.*

⁷ Ambal bu'unai Godi nawalapa pepel anan-
inai ma epes hiasi atona atina nagatopalopa
hiiasi hi'agalas. ⁸ Epen atitin Ambal bu'unai
Godi naso'an pepela nigihimba'masa gawa hi-
ani bu'wani naninani ma negawalapa epes hi-
asi. Ea' anin daian Ambal bu'wali Godi anamba
atona nasso'an pepela negawalapa basef kofagefa
waf Godi ma atiasi esis amam nematawa so-
gogawana andeande!. ⁹ Ea' anin epen daian
Ambal bu'unai Godi atona natopalopana naga-
hapifa God banagambel nanda' maol ananini
andeande!. Ea' anin epen nefal' pepela ne-
topalopa aowas nanda'asi sogataga bo'wes. Am-
bal bu'winai ea' anamba atona.* ¹⁰ A anin epen
Ambal Godi natopalopan nasso'an pepela nenda'
hiahaom banagami si'i God nanda'ami. Apa'
anin daian Ambal Godi nasa'mana niga'i basef
God. Anin daian nefal' gawa ma negawawalog
spirit ambagof mamimami hiami, bu'wami a'a
awami. A anin daian negawama niga'i diga nan-
inani daiana hianai. Ea' anin daian negawama
negambema basefa diga anamba naninani da-
iana.* ¹¹ Ambal bu'unai Godi anamba atona
nanda' maol nawalapa presen hiahaom amamba
hiami. Ama okom ananimi atom nasso'as pre-
sen hiahaom fasimi amamba mafe'ma epes hiasi
atona atin.*

* **12:6:** 1 Ko 14:26 * **12:9:** Ap 2:4; 1 Ko 14:5 * **12:10:** Ro
12:3; 1 Ko 7:7 * **12:11:** 1 Ko 10:17

*Alop wa'a wa'apa alop atotop pondola'waifa
presen hiami fasimi mamimami*

¹² Presen hiami fasimi mamimami si'i alop apa' epesi. Alop apa' epesi atifip, apa' sa'osa'opa hiapi ea' alop apamba hiapi lu'up sa'op pafe' pail alop si'ip atotop. Krais wapani na'amba atin.* ¹³ Dei' main, apa' hiapai mofa' sa'ofa Ambal bu'unai Godi atotona. Nanda'apa mataga alop atotop, esis Juda saloma owa' Judaisia saloma esis agof akasi a esis sagape wahifisi, owa' sogape lafela anis daiasia wapani. Apa' hiapai mofa' Ambal Godi atotona nape si'ina nelelemb ape'ilimbi.

¹⁴ Apa' mogawa alop ina atifiminap, owa'atin. Alop sa'osa'opa hiapi. ¹⁵ I'i bo'waga gi'ias gi'i, "Ae' ina a' lagol agape alop si'ipi, owa!." I'i bo'aga agamba giga'i basef na'ambaifi, ina andeande', owa!. Basef ifimbai hapaifi. Bo'waga gandala gape alop si'ip apamba atop.

¹⁶ Ea' aliga wapani gi'ias gi'i, "Ae' ina a' naep ape alop si'ip, owa!." I'i aliga giga'ias na'ambai, ina andeande' owa!, basef ifimba hapaifi. Aliga gandala gape alop si'ip apamba atop. ¹⁷ I'i alop hiapi si'ip ea' naep atipap hi'ilapei, dei' pogahembe' pome' basef pi'imama? Owa'atin. I'i alop hiapi si'ipa aligah atogah hopaop hi'ilapai, dei' pogahoma alogw pome'agw pi'imama? ¹⁸ Apa' alop ina pataga si'i na'amba, owa'atin. God atona fowa' nogawa okom mandanda'ma alop atona atin lu'up sa'op dei' nanda'ap pape pandahama si'i okom ananimi atom maga'ias. ¹⁹ I'i alop si'ipa anop alop atifip popaop hi'ilapai, dei' atiasi alop

* ^{12:12:} Ga 3:28

apamba si'ip pope mama? Owa'atin. ²⁰ Apa' alop ina pataga pandanda' na'amba, owa'. Alop wa'awa'ap sa'osa'opa hiapi, apa' alop si'ip atifip.

²¹ Naep ina la'ifipa pi'ipa lagof pigal'i, "Afa' wandaiwa'ma ipa' pepe pegalomafa. Afa' atofa ogape, dao' andeande!."

Ea' balaga wapani ina la'ifigama gi'ipa bo'wagah giga'i, "Ae' andaiwa'ma ipa' pepe pegalome, owa'. Ae' atowe epe, dao' andeande!" Owa'atin.

²² Alop apamba wa'awa'ap falafalafupa apa' maga'i owa' banagapia, i'i apamba owa' pondala popea, atiasi alop apamba si'ip ina potaga banagep, owa'atin endilisi. ²³ Ea' alop apamba wa'ap apa' ambagof awagofap, apa' mofalo'map a'owa' mumafiap datima. ²⁴ Apa' alop wa'ap owa' ambagof awagofapia apamba apa' ina mofalo'map mumafiap na'amba, owa'. Alop apamba ila ma pogape dowaf. God atona nasa alop apamba wa'owa'op hiapi sa pail atogon pataga atifip. Anop wa'ap agof akapi apa' anen nofalap agof lu'wagufi fandandap. ²⁵ Anen nanda'as na'amba ma alop apamba ina atiasi pondawal wa'awa'ap, owa'atin. Alop apamba hiapi wa'awa'ap a' ukup pindaima atin pundumafuma andeande! na'amba atin. ²⁶ Ama i'i alop wa'ap pome' akepehap, alop hiapi si'ip atiasi pome' akef na'amba atin. Apa' i'i anis epes sinifela wa'ap, hiapi si'ip sonohap hi'ilap polomap.*

²⁷ Isimba atis dei' ipa' hipai pape alop Kraisi si'ip. Ea' ipa' hipai atona atin alop wa'awa'ap

* **12:26:** Ro 12:5; Ef 5:30

ananipi.* ²⁸ God nahapona anis epes ananisi sape na'amba ma sios. Magali'i aposel, sagagi'i profet, sagafe'ma wanifi, esis tisa sagawalipasa basef kofagefa Godii. Ama main, sagagi'ma amambai epes isimba sanda' betena sanda' banagami si'i God nanda'ami. Ea' epes isimba sanda' awasisi bo'wes wapani, a esis isimba sagatopalopa anis daiasi, saloma amom mugumafi maol siosi naninani hianii, ea' saloma isimba sogawa ma siga'i diga naninani daiana hianai. ²⁹ Dei' ipa' ukup pandanda' pegawa pa'imama? Ipa' pa'i amom hiami hi'alam mape aposel atom? Pa'i amom hiami hi'alam mape profet atom? Ipa' pa'i amom hiami hi'alam mape tisa atom? A pa'i esis hiasi hi' alas sanda' hiahaom banagami si'i God nanda'ami? ³⁰ Pa'i esis hiasi hi' alas sofa' presen hiahaom fasimi ma sonda' awasisi sogotaga bo'wes wapani? A pa'i esis hiasi hi' alas sogawa ma siga'i diga naninani daiana hianai? Pa'i hiasi hi' alas sogawa ma sogambema basefa diga anamba naninani daiana? Owa'atin endilisi.* ³¹ Apa' ipa' hipai a' ukup kilikala' pindapindaila pegefa' presen hiahaom fasimi magali'i.

Ea' dei' a'i ihimba'mepa ano'w ufia'w atoto'w bo'ombo'okw kwikila' endilisi presen inimba hiani.

13

Apa' ukup pelele' pindaila anis amam nematawa endilisi

* **12:27:** Ef 4:11-12 * **12:30:** 1 Ko 14:1

1 I'i ae' egawa ma iga'i diga naninani epesi goloma enseli wapani, ma ae' owa' okom mimilas ese'asa nembel etopalopasa, malogol diga ae'agai falafugai atoga si'i sagaha olefi wata sagala' dowaf.* **2** I'i Ambal bu'unai Godi nose'e presen hiahaom fasimi nosa'me ma egawali-pasa basef Godi ma egegawa okom hiami Godi mape mandamabahi'i hi'igalam, ama egegawa gawa hiani hi'igalan wapani, ma igahapifa God banagambel endilisi ma la'ifiwi esapa' halafutagw gogafe' gani do'wan, apa' ae' owa' okom mimila esis amam nematawa endilisi, ae' falafuwai atowe.* **3** I'i ae' egaso'asa hiahaom hiami ae'ami hi'igalama esis isimba kwahusa hiahawesi ma enda' maol Godi iga'i aho'ma anis epes sandaiwa'ma Godi si'i sehe sogaofe nif egaga'. Apa' ae' owa' okom mimilas ese'as nembela, ea' hapaimi. Anaf hiahaom amamba hiami ina motopalope molefate kwasakwasala, owa'atin endilisi.

4 Epen mamahina okom magaila anis epes daias endilisi, anin nanda' waf bu'wafi na'amba. Anin ina kwafalis nagwamasa waf awafi esis sanda'manaf anini, owa'atin. Anin nape natitilis. Anin nati epes hiasi uwahipis natopalopas. Anin ina kowagalana epes hiahaom hiamisii, owa'atin. Ea' ina nagasa'ma agol ananigili atigli, a anin ina okom maga'i anin atini, owa'atin.* **5** Anin saisailan atin nagape andeande'i. Anin ina okom magapoma hiahawes ananisi a'owa'i, owa'atin. Anin ina okom numbutim kwafal-

* **13:1:** Mt 17:20 * **13:2:** Mt 6:2 * **13:4:** Fl 2:4

isi, owa!. Ea' ina okom magapoma waf awafi anis daias sanda'manafi, owa'atin.* ⁶ Anin ina nandagala ma waf awafi ikiakafi, owa'atin. Anin nandagala ma waf endilisifi bu'wafi atef.* ⁷ Nimaguf hiafi dondol anin nanda' waf afamba na'amba. Anin nembel bape awanembela nemaf mamahefa negame' nimanimi akafimi hi-ami. Anin ina nagandina anis epes kwafalisa waf asasifi, owa!. Anin nahapifa God endilisi nape nehfana ma nogatopalopa esis sogaloma anin wapani. Anin nalutu banagena ma nimanimi akafimi magatagaman.

⁸ Waf afamba ukup pagapagaila anis daias endilisi, afambai anaf ina higililaf, owa'atin endilisi. Apa' waf afamba Ambal Godi nasa'mapa ma mogowalapa basef ananifi, afamba anaf higililaf hi'ilaf. Presen inimba hiahaom fasimi ma epes sogawa saga'i diga naninani hiana haonai, diga anamba hiana haonai anaf hi'ilana. Presen inimba ma epes sogogawa gawa ma waf Godi, gawa inimbai anaf hi'ilan wapani. ⁹ Dei' main, dei' apa' ata' mogawa gawa du'wanin atin. Presen inimba Ambal bu'unai Godi nasa'masa sogawalapa basef ananifi si'i profet, basef ifimba wapani ata' du'wanif atif. ¹⁰ Apa' anaf hiahaom God okom ma'i motaga mugagi' endilisii mogataga, nemaf afamba hiahaom amamba dei' mogataga wa'awa'ami atiasi hi'ilam. ¹¹ Fowa' ae' ata' agape si'i awani a'i basef si'i awani. Ae' ameme'ma hiahawes si'i awani. Apa' afamba agataga dambewe, akwaha waf afamba awanii.*

* **13:5:** Ro 12:9 * **13:6:** Ro 15:1; 1 Pi 4:8; 1 Ko 9:12 * **13:11:**
2 Ko 5:7; Je 1:23

¹² Dei' apa' mati hiahaom mataga ea', apa' ina mandawalap alihim a'owa', ata' owa'. Mataga si'i mapelaga embel magati walofam atin. Apa' anaf owagama nemaf dondo'afi fegataga, dao' mundatima nogohnaep alihipa. Dei' ata' egawa wa'awa'as atis. Apa' nemaf afamba egawa isimba endilisi si'i God nogogawe.*

¹³ Dei' waf wanifif fape, afamba na'amba. Waf mogahapifa Kraisafi faloma waf mope mogahafa Godafi, waf ukup pagapagailas endilisiafi. Waf afamba wanifif. Apa' fagali' endilisii, waf ukup pagapagailas endilisi.

14

Presen hiahaom fasimi Ambal bu'unai Godi nagaso'apami

¹ Ipa' banagepa pili' ukup pindaila epes hisasi pese'asa neleemb esis. Ea' ukup ipe'ipi pendahafel endilisi ma pegefa' presen hiahaom fasimi Ambal bu'unai Godi nagase'epami. Apa' presen nagali'i ma ipa' penda' maol dindinipa pegefa'ani, inimba na'amba. Presen Ambal Godi nosa'mepa ma pegawalapa basef Godi si'i profet.* ² Apa' mogawa open ami na'i basefa' anoga diga daiagai, anin ina naso'as basef epes, owa'. Anin na'ipa God atona. Dei' main, ina anin open negawa diga agamba, owa'atin. Banagami Ambal Godi atom anin na'i basef ifimba fowa' fape fandambahil'i. ³ Apa' open ami Ambal Godi nasa'mana naga'i basef Godi si'i profeti, open

* **13:12:** 1 Te 1:3; 1 Jo 4:16

* **14:1:** 1 Ko 12:31; 1 Ko 14:39

inimbai na'ipasef nowa' banaga hapif asasini ea' fasa'masa sonda' waf fasifi fenda' opalef asasilifi awanelef. ⁴ Epen ami naga'i basefa anoga diga daiagai, anin newa' banaga opaf ananifi atof. Apa' epen ami Ambal Godi nasa'man nawalapa basef Godi si'i profet, inimba newa' banaga esis sios amam nematawa Kristen.* ⁵ Ae' okom ma'i ipa' hipai hi'ilipa pi'i basefa anoga diga daiaga. Apa' epen ami Ambal Godi nasa'mana newalapa basef Godi si'i profet, anin nikila' epen inimba naga'i basefa anoga diga daiagai owa' nembemef ni'if alihifa. Dei' main, i'i epen inimba owa' nembemef ni'if alihifa, basef ifimba ina fewa' banaga esis sios amam nematawa Kristen sagame'afi, owa'atin. Apa' i'i negambemef alihifa, dao' basef ifimba fewa' banagas.

⁶ Alipipai, ipa' ukup pendame' basef ifimba andeande'. I'i ae' efe'mago ipa' ma ega'i basefa anoga diga daiaga, atiasi etopalopepa ewa' banagaipa i'imama? Owa'atin. Apa' i'i embe-mef iga'if, dao' ese'epa anif basef God nighimba'miefi ea' ese'epa gawa fasini ipa' a'a iwalipipama basef kofagefa Godi si'i profeta Ambal Godi nosa'me egawalipipafi.

Apa' mondawalapa basef Godi alihifa diga

⁷ Hiahawes ambal akasi, si'i batagwi gita, amamba ea' na'amba atin si'i diga agamba hia-gai. I'i amom owa' mogal melef monda' maguffafifafi fetagaia, apa' atiasi mogahembe' mogawa maguf amamufi alihif mi'imama? Owa'atin. ⁸ I'i bugel alof owa' fogal fi'i alihifa, amom

* **14:4:** Nam 11:29

monda' wandafi silisilawi mope mondandombola wandaf mi'imama? Owa'atin. ⁹ Ipa' wapani na'amba atin. Ipa' i'i pil'i basefa anoga diga esis owa' sogogawagaia, atiasi sogawa basef ifimba kofagefa si'imama? Owa'atin. Atiasi basef ipe'ifi fefe' higililif dowaf. ¹⁰ Endilisi, diga hiaga haoga gape itap apa'e. Apa' ina anoga diga falafugai dowaf, owa'atin. Basef kofagefa fape diga gagigagi hiagai. ¹¹ Ae' i'i owa' egawa basef kofagefa anin epen naga'iafia, atiasi anin okom mopoma ae' ni'i ae' epen aga'i anoga diga anambel wambeli. Ea' ae' wapani okom mapoma anin i'i naga'i anoga diga anambel wambili. ¹² Ipa' wapani na'amba atin. Ipa' ukup pa'i a'owa' ma pegefa' presen hiahaom fasimi Ambal Godi nagase'epami. Ea' ipa' dao' pendanda' maol banagambel endilisi ma pegefa' presen inimbai negewa' banaga hapifa siosi.

¹³ Ea' epen ami naga'i basefa anoga diga daiagai anin nendanda' betena Goda nogoso'an gawa negambema basefa diga agamba. ¹⁴ Dei' main, i'i enda' betena anoga diga daiaga, ambal ae'ali atol landabeten, apa' okom ae'ami mape dowaf.* ¹⁵ Ea' dei' atiasi enda'as i'imama? Ae' endanda' betena ambal ae'ali eloma okom ae'ami wapani. Ae' endanda' awalefa ambal ae'ali eloma okom ae'ami wapani. ¹⁶⁻¹⁷ I'i ipa' pinifela Goda ukup ipe'ipi atip, ama anin epen owa' nefal'anin presen hiahaom fasimi Ambal Godi nagase'epamia, dei' atiasi anin negawa ni'imama ma beten inimba ipe'ini ma nigai' endilisi? Owa'atin. Endilisi, i'i ipa' pendabeten pil'i basef fasifi a'owa',

* **14:14:** Ef 5:19

ina atiasi pewa' banaga nembela epen inimbai, owa'atin. Dei' main, anin ina negawa basef ifimba ipa' pagal'iefi, owa!. **18** Ae' anifela God nimaguf hiafi ma ae' aga'i basefa anoga diga daiaga. Ipa' ina la'ifipama penda'ope, owa!. **19** Apa' eloma esis sios mondakolas, ae' a'i i'i basefa amef bandafi wanifif biafifa okom ae'ami iwalipa esisa sogogawef. Ama ae' i'i basefa amef laulaufi fetaga hihif 10,000 pelaifa anoga diga daiaga gagasi'i, ea' hapaifi, falafifi atif.*

20 Ipa' alipipai, ipa' ina pepe ukup pelapefe' si'i awasi, hapaimi. Waf awafi, dao' ipa' ukup be'ep pepe andeande' ukup pese'epaf si'i awasi. Apa' nomonas ipe'isi sondataga si'i epes dambesi.* **21** Anif basefa mu'uli Godi fagail buki faga'i na'amba fa'i,

"Dembinai na'i, anaf Ae' enda' anis epes anota wambota saga'i anoga diga daiagai isa'mas si'ipasa basef ae'afi epes isimba ae'asi, apa' esis ina atiasi sila basef ifimba, owa'atin."

22 Dei' apa' mogawa presen inimba pagal'i basefa anoga diga daiaga, inimba ina ametal God nanda'ana esis sagahapifanai, owa!. Anen nanda'ana epes isimba owa' sogahapifanaia. Apa' presen inimba Ambal bu'unai Godi nasa'mepa pawalapa basef ananifi si'i profet, inimba ina ametal God nagaso'asan epes isimba owa' sogahapifanaia, owa!. Inimba ametal isimba sagahapifanai atis.*

23 Ea' i'i esis amam nematawa sios hiasi sondakolas atogona ama ipa' hipai a' pi'i basefa

* **14:19:** Ef 4:14; Fl 3:15 * **14:20:** Ais 28:11-12 * **14:22:** Ap 2:13

anoga diga daiagama anis epes owa' sogofa' presen inimbaia o anis owa' sogahapifa Kraisia sifil'i sope sogalomepa, atiasi asi'i, "Ipa' ukup magahipai."*

²⁴ Apa' i'i Ambal bu'unai Godi NASA'ma ipa' hipai ma pegawalapa basef Godi si'i profet ama i'i anin epen owa' nogohapifa Kraisia o owa' negegawa basef Godi andeande'ia nifi'i negawis, ama basef ipa' hipaii atiasi feha nembel epen inimbai ea' fewaloga opaf ananifi ma waf maif awafi fagapani.* ²⁵ Basef hiafi fape fandambaho' okom ananimii, ifimba atiasi afetaga fendawalap alihifa anin nifi'i nindiwa nembawa nitimalo' nefela agol Godi nowalapa basef na'amba ni'i, "Endilisi atis, God nape nalomepa."*

Waf hiafi lotufi a' fendataga andeande'

²⁶ Ipa' alipipai, dei' basef ifimba akutaifi ae'afi fagape na'amba. Nemaf afamba pendakolas, presen inimba hiani Ambal Godi nagaso'apani napoma ipa' hipai na'amba. Anin epen nenda' anaf awaf, anin daian ni'i anif basef Godi ni-walipipa, a anin God naso'ana anif basefa negawalapef, ea' anin daian negawa ma nigali'i anoga diga daiaga, a anin daian negawa ma negambema basef ifimba. Ipa' pendanda' hia-haom amamba hiami ma pegewa' banaga hapif esis amam nematawa sios. ²⁷ I'i anis ukup pehafela siga'i basefa anoga diga daiaga, bias a'a wanis sinda'i basef atona atin. Ea' ma'wis isimba. Apa' ina a' si'if atef, owa'i. Sinda'if

* **14:23:** Jo 16:8 * **14:24:** Ais 45:14; Sek 8:23; Jo 4:19 * **14:25:**
1 Ko 12:8-10; Ef 4:12

atona atin. Ifimba ea' ma'uf. Ea' anin open atitin a' nendambema basef ifimba. ²⁸ Ama i'i owa' anin opena negambemefa, dao' open inimba na'i niga'i basefa anoga digai a' nendasopama malogol ananigili ma basef ifimba ma esis sandakolas. Bola anin atin ni'if nendalomma God.*

²⁹ Apa' amom profet biam o wanom Ambal Godi NASA'mama mogawalapa basef ananifi, amom a' mondawalapef. Ea' anom daiam mowawalogalpa basef ifimba. ³⁰ I'i anin open tol nepe lotu neme' basefa God nihimba'mana anif basefa open inimba, dao' aman anamba nali' nalutu nagawalapa basefi a' nondasopama malogol. ³¹ Ipa' hipai Ambal Godi NASA'mepa pawalapa basef Godi si'i profet, ipa' pewalapef atona atin pi'if daindai ma epes hiasi seme'ef solafafa fegewa' banaga hapif asasini. ³² Epes ami sogofa' presen inimba Ambal Godi NASA'masa sogawalapa basef ananifi si'i profet, a' sundumafi presen inimba andeande!. ³³ Dei' main, God ina nanda' waf uluwali, owa'atin. Anen nanda'waf usi'ifi opalef atifilif fagape awanelifi.

Apa' sios amam nematawa Kristen sunduwa'anima sogape,* ³⁴ awo nematawa ina a' ulutu wi'i basef, owa'i. Awo osopama malogof ope dowaf. Sios apa' amam nematawa Godi waf ea' afamba atef. Nematawa ina a' ope wili'ma sios, owa'i. Ondape lafel si'i mu'uli Godi naga'ias. ³⁵ I'i awo wi'i ogogawa anif basef kofagefa, bola ofe'ma ifagw asasigwi a' uhali' wauhupawa mi'ipawaef. I'i ano'w nemata'w

* **14:28:** Ap 17:11; 1 Te 5:21 * **14:33:** 1 Ko 11:3; 1 Ti 2:12; Ta 2:5

konda' basef ipa' sios pandakolasa, waf afambai ambagof awogufafi.

³⁶ Dei' a'i ihal'iipa. Ipa' kofagepama basef Godi? Ipa' atipa pefa' basef Godi a anis amam nematawa daias owa'? Owa'atin.* ³⁷ I'i epen ami okom mondanda' ni'i Ambal Godi NASA'man nawalapa basef Godi si'i profet, a'a ni'i anin nefal presen anin daian, anin a' nendegawa basef ifimba dei' anda'ef ipe'i, ifimba mu'uli Dembinaii. ³⁸ Ama i'i anin nindaiwa'ma basef ifimba, ipa' wapani pindaiwa'ma anin.

³⁹ Ipa' alipipai ae'ipai, ukup ipe'ipi pendehafel endilisi ma Ambal Godi nosa'mepa pegawalapa basef ananifi si'i profet. Ea' ipa' ina pesopama ufa'wa piga'i basefa anoga diga daiaga, owa'.* ⁴⁰ Apa' ipa' Kristen pendakolasa lotu, ipa' pendanda' maol andeande'ma atiasi dakolas ipe'ini negataga bo'wen.

15

Krais naga' ea' notanima nosafel wapani

¹ Ipa' alipipai, dei' ae' a'i esa'ma nomonas ipe'isi wapani ma basef amamba bu'wami Godi ali' agasi'ipami. Ipa' pefa'am ea' basef amamba atom dei' pahapilam palutu banagepamam. ² Ae' a'ipipa basef amamba bu'wami. I'i ipa' pi-hapilam tatala'im, God nofa'epa nokwahomepa waf awafi pitanimai. I'i owa', pahapilam dowad-owaf alop atop ando!.*

* **14:36:** 1 Jo 4:6 * **14:39:** Kl 2:5 * **15:2:** Ais 53:8-9

3 Basef ali' agasi'ipami, amamba ae' fowa' ali' egefa'ami. Amamba na'amba. Krais naga'ma nagakwaha awami ape'imi, si'i Baibel fowa' naga'iam.* **4** Ea' esis sofa'ana salana nowaga matmat. Ama nimaguf bif hi'alef fagafe'ma wanifi, God NASA'mana wapani si'i Baibel naga'iam.* **5** Ama main, nali' natagama Pita ea' nagi' natagama alipumi animimi 12-pelaim. **6** Ea' nataga nandawalapa esis amam nematawa Kristen hiasi satolona, isimba alipisi sagaila anini hiasi a'owa' sikila' epes 500-pelais. Dei' anda' basef ifimba fafe'mago ipa', a'i alipisi isimba hiasi dei' ata' sape, apa' anis asaga' ea!.* **7** Ma main, natagama Jems natolona. Ea' natagama amom aposel hiami matolona.* **8** Ma main, owa' ae' agi' endilisi atolona wapani, natagama ae' si'i awani ma'man kogolan ata' kwapeti'i.*

9 Dei' main, ae' ata' sa'owe ape awani falafuwai la'afena amom aposel. Ae' ina dei' bo'wawe ma epes sofale siga'i aposel, owa!. Dei' main, anda' maol agahambombaga sios Godii.* **10** Owa' God atona okom maimaili natopalope dowaf nanda'e ape andeande!. Ea' dei' ae' ape. Anan nagatopalope dowaf, isimba ina safe' senalo, owa!. Sanda'e anda' maol banagambel a'owa' ikila' anom aposel daiam. Apa' ina ae' atowe anda' maol inimba, owa!. God natopalope dowaf, isimba atis dei' ape anda'am atapiwi.

* **15:3:** Mt 12:40; Ap 2:24-32 * **15:4:** Lu 24:34; Mt 28:16-17

* **15:6:** Lu 24:50 * **15:7:** Ap 9:3-6; 1 Ko 9:1 * **15:8:** Ef 3:8;

1 Ti 1:15 * **15:9:** Ap 8:3; 2 Ko 6:1; 2 Ko 11:5,23

11 Apa' basef ifimbai, ae' anda'am a'a amom manda'am, owa!. Basef ifimbai wamunaifi hapafi. Basef amamba bu'wami fasimi atom afa' hiafai wawalipipam ea' amamba atom ipa' pa-hapilam sisihim.

Anaf owagama epes sagaga'i sosafel wapani

12 Dondol afa' wawalapa basefa Krais nagaga'ma God nasa'mana nogosafel wapani. Dei'maina ipa' anipa pa'i basef na'amba paga'i, "Epes sagaga'i ina anaf sotanima sosafel wapani, owa!?"?

13 Ipa' anipa pa'i endilisi esis sagaga'i ina sotanima sosafel, owa!. I'i basef ipe'ifi endilisifiai, Krais wapani, God ina nasa'mana, owa!. Apa' owa! owa'atin. **14** I'i a' endilisi God owa'nosa'ma Kraisai, dei' basef amamba afa' wagawalapami falafumi atom ea' waf ipa' pagahapifa Kraisafi falafifi atef wafifi.* **15** Apa' i'i na'ambaiai, anif basef wapani. Dei' afa' a' otaga amam wambaso'am wagawalapa basef Godii. Dei' main, afa' wa'i basef alihif wawalapefa God nasa'ma Krais nogosafel wapani matmat. Apa' i'i endilisi God owa' nosa'ma sagaga'i, dao' anen ina nosa'ma Krais wapani, owa!. **16** Aho', ipa' anipa pa'i God ina nosa'ma esis epes sagaga'i, owa!. I'i basef ipe'ifi endilisifiai, God ina nosa'ma Krais wapani, owa'atin. **17** Apa' i'i endilisi God owa' nosa'ma Kraisai, dei' waf ipa' pagahapifa Kraisafi ina banagefa fegatopaloapepa, owa'atin. Falafini atin. Dei' ipa' ata' papoma waf awafi atapipa. **18** Ea' epes isimba sagape sisihsisa Krais

* **15:14:** Ap 1:22, 4:33; Ap 5:32

sagaga'i, esis wapani higililas hi'ilas. ¹⁹ Apa' mahaipifa Krais ea' mape mohafa anen. I'i apa' mohapifana mope mohafana nimaguf magape itap apa'e atep, mope awepa kwahupa a'owa' mope migi' endilisi. Andeande'ma esis soga'i uwahipigama anis hiasi sogosambala Kraisi kwasakwasala, apa' magahapifanai a' sonda'i uwahipigamapa a'owa' endilisi. Apa' owa', owa'atin.*

²⁰ Ina' na'amba, owa'. Krais anaga' ea', owa' dei' endilisi God nafelana nosafel wapani. Anen nosafel na'amba nali'ma epes sagaga' ea'i, si'i gwa'aisi' sali' sagaof aofi.* ²¹ Dei' main, anona aman atotona nali' nawalapai waf epes sagaga'afi, ea' na'amba atin anona aman diana nali' nawalapai ufia'w akwamba sagaga'i sogosafela'wi. ²² Hiahaom amamba na'amba. Mini'ap Adami hiasi hi' alas saga' atin. Ea' na'amba atina epes isimba hiasi hi' alas sagape sisihisa Kraisi, anaf God nond'a's sosafel wapani sofa' ambal namili ma sogape namis.* ²³ Apa' epes hiapai atona atin mope mondasasa nogota ape'itai. Aman nagali'i, anen Krais. Anen si'i gwa'aisi sali' sagaofi. Ama nemaf afamba nogotanimafi, apa' hiapai ananipai a' mosafel wapani. ²⁴ Ama main, nemaf akutaifi fetaga ma hiahaom hiami awami higililam hi'igalam. Nemaf afamba Krais a' nohambombaga banagami hiami mamimami bu'wami awami magape ilif itapi hi'ilam, ea' noso'ana banagami ananimi ma nugumafi hiahaom hiamii mefe'ma ahamana

* **15:19:** Kl 1:18 * **15:20:** Ro 5:12,18 * **15:22:** 1 Te 4:16; Re 20:5

God.* ²⁵ Dei' main, Krais a' nope Dembinai King nefe' nefe' notagama nemañ anen nogatalogofa bousi ananisi hiasi sogafe' lafela bo'wagah ananigahi hi'igalas.* ²⁶ Anen a' nili' nili'amona bousi isimba hiasi ea' nigi' nili'amona ga' si'i bounai nape nagagi'ii nosopamana hi'ilana.* ²⁷ Dei' main, fowa' God na'ias na'amba na'i, "Anaf ae' enda' hiahaom hiami, hi'ilam moloma epes hiasi wapani sefe' lafela anen."

Basef ifimba faga'i God nanda' hiahaom hiami mogafe' lafela Krais atona. Ea' apa' mogawa basef ifimba faga'i na'amba fa'i hiahaom hiami ifimba ina fa'i God, owa'. Anen nanda' hiahaom amamba hiami mape lafela Krais. ²⁸ Nemañ afamba hiahaom amamba hiami mogafe' lafela Krais hi'igalam, ea' Nogamana Godi atotona a' nofe' lafela anen nali' nanda' hiahaom amamba magafe' lafela Kraisi. Ea' God nope nogali' endilisima hiahaom hiami hi'igalam moloma epes hiasi wapani. ²⁹ Anis epes sati waf bu'wafi anis Kristen sape banagesa bousi sahas saga' ea' epes isimba satilis sahapifa Krais sofa' baptais. I'i epes sagaga'i anaf owa' sosafel wapania, epes isimba sogofa' baptaisa epes sagaga'i anaf sogawa sotaga sope si'imama? I'i endilisi ma anin atitin nagaga'i anaf owa' nesafel wapania, dei' maina isimba sogofa' baptaisa epes sagaga'i? Owa'atin.* ³⁰ Afa' wapani, dondol anis sa'i so-hambombagafa. I'i epes isimba sagaga'i owa' sotanima sosafelai, dei' maina afa' wanda'as wa-

* **15:24:** Mt 22:44 * **15:25:** Re 20:14, 21:4 * **15:26:** Sam 8:6

* **15:29:** Ro 8:36

gape na'amba? Owa'atin. ³¹ Alipipai, endilisi ae' andagalaipa ma pagape sisipama Krais Jisas dembinai ape'inai. Ea' anif basef wapani endilisifi atif si'i ifimba. Nimaguf hiafi danda ae' ape si'i agaga'i.* ³² Ae' agape Efesus apa' anda' wandaf aloma mafis magail alupi lu'wami. Amamba atiasi ae' efa' hiahawes bu'wasi maisam? I'i a' endilisi esis sagaga'i owa' sotanima sosafela, ea' si'i anis epes gawaisi saga'i, "Hapaisi, apa' mea' gwa'aisii embela naman mogaga!."

³³ Na'amba anis epes sombaso'mepa. Anif basef gawaifi fa'ias na'amba fa'i, "I'i apa' mofe' mogaloma epes sanda' waf awafii, esis a' soham-bambaga waf bu'wafi ape'ifi."*

³⁴ Dei' ipa' pekwhaha ukup amamba magahipai, pitanimai a' ukup pendape andeande'. Ipa' ina penda' waf awafi wapani, owa'i. Ae' enda'epa ambagof awagofa anif basef dei' iga'ipipafi. Anis epes ipe'isi ina dei' sogawa God endilisi, ata' owa' atin. Kofagema amamba ipa' atipa.*

Alop pagaga'i pogosafel wapani, anop daiap

³⁵ Apa' anona aman atiasi nogahali' na'amba ni'i, "Esis sagaga'i anaf sosafel si'imama? Anaf sofa' alop mamahopa ma sogosafel wapani?"

³⁶ Anen nogahali'ma basef na'ambai okom magahanai. Dei'main, apa' magawa olemb witimb o hiahawes, isimba owa' sogaga'ia atiasi isimba ina sope namis, owa'atin. ³⁷ Hiahawes isimba apa' magawasi, isimba ina sataga atifis hi'ilas si'i

* **15:31:** 2 Ko 4:10-11; Ais 22:13; Lu 12:19-20

* **15:33:** Ro 13:11; Ap 26:8; 1 Ko 6:5

* **15:34:** Jo 12:24

agof o soh mais, owa'atin. Apa' mawa nalelef atelef dowaf, anis gwa'aisi dalias.* ³⁸ Apa' God atona nanda' nalelef afalemba pepe'alef fataga nohotagw ea' soh handanda'alef afis mais sagi' sataga sail si'i anen atona okom mandanda' na'i sogataga. Ea' anen atona nandanda' lawah si'igah haloma soh maisa hiahawes hiasi ma gwa'aisi isimba atona atin daindai.

³⁹ Alop hiapi hiahaop ambagof fagapaipi ina atotop, owa'atin. Alop epesi anop daiap, alop mafisi anop daiap. Amigufi anop daiap, a agufi anop daiap. ⁴⁰ Ea' hiahaom magape heveni maloma magape itapi amamba hiami mape. Apa' sosafa hiahaom anef daiaf, sosaf itapafi anef daiaf. ⁴¹ Awin alipini anef sosaf, a owambini anef daiaf. Ondowa anef sosaf, apa' ondowa wapani hiafi daindaiaf.

⁴² Waf sagaga'i sogosafel wapani, afamba ea' na'amba atin. Alop apa' dei' magawapi, apamba atiasi aop folo'ogalapi. Alop pogosafel wapanii, apamba ina anaf awapi, owa'atin. Pepe at-apip.* ⁴³ Alop apa' magawapi, apamba a' awasip folo'ogalapi. Alop pogosafel wapanii, apamba bu'wapi fasipi endilisi. Alop magawapi apamba ina banagapi, owa'. Alop pogosafel wapanii, apop banagapi. ⁴⁴ Alop apamba a' magawap, itapi. Apa' alop pogosafel wapanii, ilifapi, Ambal bu'unai Godi nugumafiapi.

Alop apamba biafip ilifapi itapapi pape.* ⁴⁵ Baibel wapani naga'i na'amba na'i, "Aman

* **15:37:** Jen 1:11 * **15:42:** Fl 3:20-21 * **15:44:** Jen 2:7; Jo 6:63; 2 Ko 3:6,17

nagali'i Adam nataga ambal namilinai."

Apa' Adam nagi' nagatagai nataga ambal bu'unai ma nogaso'as ambal namili epesi. ⁴⁶ Apa' alop ilifapi ina pataga pali', owa'atin. Alop itapapi apop pataga pali'. Ea' alop apamba ilifapi pataga pagi!.* ⁴⁷ Aman nagali'i, God nanda' itap nanda'ana nataga ambal lapaona. Apa' aman nagi' nagatagai, anen aman heveninai. ⁴⁸ Apa' epes hiapai itapipai, apa' mandati na'amba atin si'i aman anamba God nanda' itap nanda'anai. Apa' epes hiapai hevenipai anaf motaga mundati na'amba atin si'i aman anamba nagafi'i heveni. ⁴⁹ Dei' apa' ata' mape si'i aman anamba itapanai ea' anaf mope na'amba atin si'i aman anamba nagafi'i heveni.*

⁵⁰ Ipa' alipipai, dei' a'ipipa basef ifimba usi'ifi. Epes itapasi anaf ina la'ifisa sogawis anamba God nagala'ambemagoma, owa'atin. Hiahaom itapami higiligalami ina anaf la'ifima mofa' banagami mogape liflafi, owa'atin.*

⁵¹⁻⁵² Ipa' peme', dei' ae' a'i ewalapa anif basef fali' fape fandambahai' ma ipe'i. Anaf apa' hiapai ina mogai', owa'. Atef bif kwafalis atis alof akutainai nogalef, apa' hiapai anaf mondambema hi'ilepa amondati na'a. Dei' main, alof anamba nelef ea' ma esis sagaga'i sogosafli, anaf ina ata' soga' wapani, a'owa'. Ea' apa' mogape itap apa'e wapani mondambema amondati na'a.* ⁵³ Dei' main, alop apamba apa' magawapi anaf apotoga pondehi namop pope andeande'

* **15:46:** Jen 2:7 * **15:49:** 1 Ko 6:13 * **15:50:** 1 Te 4:15-17;
Mt 24:31 * **15:51-52:** 2 Ko 5:4

lifilafi. Alop apamba pagaga'i apotaga namop pope dondol.* ⁵⁴ Endilisi, alop apamba magawapi anaf potaga dambaip pope andeande' lifilafi. Ea' alop apamba pagaga'i anaf posafel apondati na'a pofa' ambal namili pope dondol. Nema afamba anif basef Baibelifi afetaga faga'ias na'amba fa'i,

“God natalogofa ga' nikila' wandof nanda'am hi'alam ea!.”*

⁵⁵ “Ina', ga', banagami ine'imi amuma? Ea' wamba'w ine'ikwi hikali'wi akuma? Owa'atin endilisi.”*

⁵⁶ Wamba'w sagaga'ma'wi kwataga ma waf awafi ea' banagami ma waf awafi magataga na'amba. Apa' epes hiapai mumbisila' basefa mu'uli Godi hi'alapa. Isimba atis dei' mu'uli inimba nawalapai banagami ma waf awafi. ⁵⁷ Apa' mundanifela God. Ama banagami Dembinai ape'inai Jisas Kraisi atom God nowa' banagapa ma dei' migikila' wandafa mogali'amona waf awafi.*

⁵⁸ Ea' dei' ipa' alipipai endilisi ae'ipai, pendape banagepa andeande'. Ina ombal mehepa kwasakwasala pendahagas, owa'i. Dondol ipa' banagepama penda' maol Dembinai. Dei' main, ipa' pegawa maol inimba panda'ana Dembinai, ina anaf newala dowaf, owa'atin.

16

Otamba begatopalopa amam nematawa Godii

* **15:53:** Ais 25:8 * **15:54:** Hos 13:14 * **15:55:** Ro 6:14, 7:13

* **15:57:** 2 Kro 15:7; Re 14:13

¹ Dei' ae' anif basefa otamba ipa' pa'i pekolasamba pegaso' esis amam nematawa Godii. Ae' ali' ihmiba'mas ufia'wa sonda' maol inimba ma esis sios Galesiaisi sondakolas daindai ea' dei' a'i ipa' penda'as na'amba atin.* ² Sande nimaguf danda ipa' hipai atona atin ukup pendanda'ma otamba pegefa'amba wik gagali'i ea' pewaloga otamba ambamba pembe'amba dondo' ma ipa' pegefa'amba be'eh dei pimafi-amba ifagw ipe'igwi. Ama anaf ipa' ina penda' maol lu'wanima pegelaoma otamba pegasa'amba, owa!. ³ Anafa etagamepa, dao' ipa' pendandepa anom amama mogofa' otamba ambamba mogafe' Jerusalem. Ama ae' ese'ama basef amoma mofa'ef esapa'am mogafe!. ⁴ I'i andeande'ma egafe' wapanima, dao' amom mofe' molome.*

Pol na'i nef'e' niti esis Korin

⁵ Anaf ae' efo'o ili' ewala itap lu'upa Masedonia, ea' efo'o tagamepa. Dei' main, ae' okom mandanda' a'i ata' ili' ewala itap apamba Masedonia efe!.* ⁶ Ae' okom mandanda' ma'i ata' epe anif nimaguf elomepa. Ae' ina egawa, epe elomepa nimaguf ma'wif nogota naoh gogohafel lu'ugwatai hil'igalawa ma main, efe' wambel mamahogoma, ipa' pitopalope pimafi ma hiahawes, pilutumi pehapone ufia'w.* ⁷ Ipa' pegawa, ae' andaiwa'ma igatilipa nogota bandata, owa'atin. I'i Dembinai nigai'ias na'amba ma, a'i ipani nogota laota kwasakwasala elomepa. ⁸ Apa'

* **16:1:** Ro 15:25-26; 2 Ko 8:1-9; Ga 2:10 * **16:4:** Ap 19:21

* **16:5:** Ro 15:24; Ta 3:12 * **16:6:** Ap 18:21

ae' a'i epe Efesus efe' etagama nemaf afamba Pentikos.*

⁹ Dei' main, God nausi'mi ufia'w kwagal alihil'w ea' ma enda' maol bu'wani egaloma amam nematawa hiasi sombema nelelemba sogahipifana endilisi. Apa' owa'bousi hiasi sapaogon wapani.*

¹⁰ I'i Timoti nogatagamaepa ma, dao' ipa' solawaipa andeande' pimafiana ma anen nogape opaf awanef la'afena ipa!. Dei' main, anen nape nanda' maol Dembinaii si'i ae' ape anda'an.*
¹¹ Na'amba anin open okom mondanda'mana ni'i anen falafunai nesol'ana alafuga, na'ambai owa'i. Ipa' penda' opaf ananifi fope sa'ombel pisi'ana hiahawes petopalopana ea' pilutumana pehaponana ufia'w ma nogafi'mai ae'. Ae' epe ehafana eloma anis alipisi.*

¹² Ea' basef sahomapa ape'inai Apolos fagape na'amba. Nimagufhiafi a'ipana dindinip a'i anen ata' nolomago anom alipumi ata' mofo'o mitiago ipa!, apa' anen nandaiwa' endilisi ma nogaf'o'o dei!. Nambimba i'i anen niti Dembinai nondai' ufia'w kogala nogaf'o'o, dao' a' nofo'o.*

Anif basef akutaifi Pol naga'iefi

¹³ Ipa' solawaipa andeande' pindalutu banagepama pigahapifa Krais. Ipa' pendape epes banagepama endilisi si'i dembipai ea' pendalutu banagepa. ¹⁴ Hiahawes hiasi ipa' penda'asi, ipa' ukup pindapindaila God noloma epes penda'as.*

* **16:8:** Ap 19:8-10; 2 Ko 2:12; Kl 4:3; Re 3:8 * **16:9:** 1 Ko 4:17

* **16:10:** 1 Ti 4:12 * **16:11:** 1 Ko 1:12, 3:6 * **16:12:** Sam 31:24; Ef 6:10 * **16:14:** Ro 16:5; 1 Ko 1:16

15 Ipa' pegawa wambota Stefanasi sali' sataga Kristen sali'ma Grik hiasi. Ea' esis ukup pa'ipa'i a'owa' atapisa sanda' maol sagatopalopa epes Godi. Alipipai, ae' a'ipipa dindinipa* **16** pegape lafela epes isimba soloma epes mamahisa sandao'oma sanda' maol inimbai. **17** Dei' ae' sonahe ma Stefanasi Fatunatus maloma Akaikus amom mafi'mai ae'. Dei' main, ipa' ina atiasi la'ifipama pigafil'i na'a'e, owa!. Amom dei' matopalopepa maho'ofepa mafi'mai ae' na'a'e.* **18** Amom manda' opaf ae'afi fape awanef mowa' banagae ea' mowa' banaga ipa' wapani. Ea' andeande'ma ipa' pegasa'ma agof amam na'ambaimi.*

19 Ea' esis sios sagape daindai itap apamba lu'upa walemb hielimbi agol Esiai sanda'mepago nemaf bu'wafi. Akila i Prisila saloma esis Kristen sios sandakolas ipat esis biasi, esis wapani sanda'mepago nemaf bu'wafi endilisi ma agol Dembinaii.* **20** Alipisi hiasi sagape na'a'i sanda'mepago nemaf bu'wafi ipa!. Waf apa' amam nematawa Godi, ipa' hipai atona atin pendaso'ama lagof atin pelomago sahin owan ipe'isi.*

21 Dei' ae' Pol ahapila pen lagol ae'agili atogol anda'mepago basef ifimba bandafi atif. Ae' anda'mepago nemaf bu'wafi ipa!.*

22 I'i anin epen mamahina nendaiwa'ma nigaoso'ana nembel ananimbili Dembinai, okom

* **16:15:** 1 Te 5:12 * **16:17:** Fl 2:29 * **16:18:** 2 Ti 1:15; Ap 18:2,18,26; Ro 16:5 * **16:19:** Ro 16:16; 2 Ko 13:12 * **16:20:** Kl 4:18; 2 Te 3:17 * **16:21:** Ga 1:8-9

1 Korini 16:23

lxx

1 Korini 16:24

ae'ami a'i anaf God nohambombagago epen in-imba higililano.

Dembinai ape'inai, ae' okom mohafel endilisi, a'i ina' fi'i. ²³ Ae' a'i okom dembinai Jisasi naganagaila ipe'i notopalpepa dowaf nope nolomago ipa' nowa' banagaipa.

²⁴ Ae' a'i okom lu'unai ae'anai naganagaila ipe'i nefe'mago ipa' hipai palome magape sisi-hipama Krais Jisasi.

Basef ifimba ea' ma'uf.

**Basef Bu'wafi Godi
The New Testament in the Mufian Language
Nupela Testamen long tokples Mufian long Niugini**
copyright © 1998 Wycliffe Bible Translators, Inc.

Language: Mufian

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-19

PDF generated using Haiola and XeLaTeX on 11 Nov 2022 from source files
dated 9 Oct 2020

9d2b07f2-4ac7-545a-943c-e16df691ef3f